

NEKS WIK

Krismas
na
Hepi Niu yia
Saplimen insait!!



Givim olgeta Famili na Poroman or Poromeri wanpela naispela **KRISMAS** kad long dispela yia!

Ful kala na traipela print antap long olgeta glosi kad wantaim ol envelop

K2.20

lon wanwan sais (A6) pepa
Oda mak inap long 100 kopi tasol
* Wanpela singel kala wol or piksa tasol, ino wantaim grafik disain*
• A6 105mm x 145mm

Only at... **THEODIST LTD**
THE STATIONERY SUPERMARKET
WAIGANI DRIVE, POM PH: 313 6800 MARKHAM ROAD, LAE PH: 472 5488
printquotepom@theodist.com.pg printquotelae@theodist.com.pg

8 Mail bai i kamap liklik hap taun – Parkop

Esther Bralyn Wani i raitim

Ol setelmen long Papua Niugini bai i kamap sabeb o liklik hap taun sapos ol i developim gut ol hap bilong ol na ol pipel i senisim pasin bilong ol.

Gavana bilong Nesenel Kapitel Distrik (NCD), Powes Parkop, i mekim dispela toktok bihain long em i raun na lukim ol nupela rot projek long 9 Mail i go long Badihagwa.

Gavana Parkop i tok, '8 Mail i stap aninit long pilot projek bilong mipela long kamapim olsem wanpela liklik hap taun.

Em i tok Lens Dipatmen i nid long mekim disisen long skelim graun na givim sampela long ol pipel i gat taitel na husat i save stap long setelmen i ken kisim taitel.

Gavana i tok long wok wantaim ol long bildim infrastraksa na givim ol sevis na 8 Mail bai kamap olsem wanpela nomal liklik hap taun.

Ol pipel long 8 Mail i gat wankain dri-man. Ol i no laik stap olsem setelmen yet, ol i laik kamap liklik hap taun.

Praim Minista Peter O'Neill givim tok orait pinis long givim ol taitel olsem liklik hap taim na bai 8 Mail i no moa setelmen. Dispela bai helpim ol na gutpela bilong kantri tu.

I go moa long pes...



Konstraksen Menesa bilong Harbour Engineering Kampani, Jessi Qi i sekhan wantaim Gavana Powes Parkop long nupela Gerehu 9 Mail rot projek. *Poto: Nicky Bernard*

INSAIT Polye wari long setelmen manmeri - P2

Pe bilong tisa i no redi yet - P6

Nupela Badili Polis Stesin op - P8



MiBank lonsim nupela ATM kad - P21



CHECK-IN FAST! CHECK-IN ONLINE!


Avoid the airport queue! Online Check-in is available from **24 hours** to **3 hours** before departure.
*Online Check-in is not available for flights departing Australia and Japan.

Book Flights | My Flight | Book Hotels

Online Check In

Last Name

Booking Reference



Polye wari long setelmen manmeri

OPOSISEN Lida Don Polye i wari long ol manmeri i stap long ol setelmen insait long Pot Mosbi siti.

Mista Polye i tok ol manmeri i stap long setelmen long Pot Mosbi i no save kisim gutpela wara saplai, pawa na ol arapela gavman sevis.

Mista Polye i salensim Praim Minista, Peter O'Neill, na ol memba bilong

Nesenel Kapitel Distrik (NCD) long bringim senis i go insait long ol setelmen insait long Pot Mosbi siti.

Mista Polye i tok Praim Minista O'Neill na 4-pela memba bilong NCD, em Gavana Powes Parkop, Memba bilong Mosbi Not Is, Labi Amaiu, Memba bilong Mosbi Saut, Justin Tkatchenko, na Memba bilong Mosbi Not Wes, Michael Malabag, long luk-

luk i go insait long ol setelmen na traim long bringim sampela gutpela senis i go insait long senisim laip bilong ol manmeri.

"Mi salensim Praim Minista O'Neill long stopim ol rot projek insait long Pot Mosbi. Mi laikim gavman long putim mani i go insait long setelmen na bringim gutpela sevis. Kisim pawa na wara saplai i go insait.

"Helpim ol manmeri long

kisim taitel bilong graun na helpim ol long kirapim ol liklik bisnis. Larim ol pikinini bilong setelmen i kisim gutpela skul na i go long gutpela haus sik,"Mista Polye i tok.

Mista Polye i no sapotim plen bilong Praim Minista O'Neill na Gavana Parkop long kirapim Pot Mosbi kamap bikpela siti bilong PNG.

"Stopim ol rot projek long

Pot Mosbi. Yupela i mekim dispela rot bilong husat? Ol manmeri bilong yumi long ol setelmen i no stap gut.

"Mekim sampela samting long kirapim laip bilong ol. LNG mani go we? Bikpela mani tru mipela i putim ai long em i no stap long kantri.

"Kisim dispela mani na senisim laip bilong ol manmeri bilong yumi,"Mista Polye i tok.



Don Polye

90 pesen bilong rot projek i pinis

Esther Bralyn Wani i raitim

KONSTRAKSEN bilong Gerehu 9 Mail rot projek insait long Nesenel Kapitel Distrik (NCD) bai klostu pinis. China Harbour Engineering Kampani (CHEC) i wok long dispela 22 kilomita rot.

Long Kasio Circle inap long Nain Mail em 9 kilomita em K122 milien na konstraksen bilong Baruni rot long Poreporena Haiwe inap Gerehu em 13 kilomita na i kostim K196 milien.

Konstraksen Menesa bilong CHEC, Jessi Qi i tok, "Olsem 90 pesen bilong projek i pinis na luk olsem Mas 2016 bai mipela i givim dispela rot projek i go long gavana bilong Nesenel Kapitel Distrik (NCD). Dispela projek bai pinis long taim na insait long baset stret."

Long wankain taim, Gavana bilong NCD, Powes Parkop i tok, "Mi amamas long dispela projek na bikpela samting em kwaliti bilong rot. Mi ting China Harbour i mekim gut long kwaliti bilong rot, mipela olgeta i mas amamas long progres bilong rot na kwaliti bilong en."

"Rot projek i kamap long sampela ol hap i gat bikpela salens olsem tais, ol maunten na ol hap we i no bin develop bipo tasol ol wok i kamap gut tru na i soim klia tru," Parkop i tok.

Gavana Parkop i tok olsem luk olsem ol i mekim



Gavana Parkop i bungim ol woklain bilong China Harbour Engineering Kampani i wok long Gerehu 9 Mail rot projek. Foto: Nicky Bernard

rait disisen long kisim China Harbour long wokim rot bilong mipela. Ol bikpela kampani na ol i save operet long olgeta hap, ol bikpela projek long Sri Lanka na Saina tu. Mipela i lukim strong bilong ol long hia nau.

"Progres bilong wok i kamap gut tasol mipela i surukim taim i go moa long tupela mun bikos long ol hevi long Tasion Bareks long kisim ol polisman na meri i go long narapela hap bai i daunim progres bilong wok liklik," Gavana Parkop i tok.

Em i tok konstraksen bilong ol haus bai stat long pinis bilong dispela mun o

bigin bilong neks yia we ol polis i ken muv wantaim ol famili bilong ol na laspela hap bilong rot projek i ken pinis.

Gavana Parkop i bilip tu olsem rot long Kasio Circle i go olgeta long Badihagwa bai pinis long taim tu.

Em i amamas tru long wok na strong bilong Saina Harbour na em i ting ol pipel i save slip long hap na kantri i ken amamas olsem ol i karim aut kwaliti prodak bilong ol na bilong siti long bihain.

Dispela 9 kilomita rot long Gerehu i go long 9 Mail i kostim K122 milien na narapela rot long Gerehu i go

long Friwe bai kostim K196 milien we total long Badihagwa inap long 9 Mail i kosim K318 milien.

"Mi laik tok tenkyu long nesenel gavman em Praim Minista Peter O'Neill na Nesenel Eksekutiv Kaunsil (NEC) long sapotim dispela projek na tok orait long mipela long kisim dinau long Saina Exim Benk," Gavana Parkop i tok.

Gavana i tok planti bilong ol dispela graun ol i kisim pinis na developmen bai kamap klostu. Dispela bai karim ol developmen long komesel, entatenmen, maket, ol skul na planti moa.

Gavman mas stretim Nambawan Super

OPOSISEN Lida Don Polye i singaut long gavman long givim K2.5 bilien bilong ol memba bilong Nambawan Super.

Gavman i no bin givim dispela mani long Nambawan Super. Treseri Dipatmen inap long givim dispela mani em bilong ol pablik sevan husat i save wok long ol gavman dipatmen, provinsal gavman na stututori otoriti.

Tasol em i no bin givim i go long Nambawan Super, husat i save lukautim dispela mani bilong ol manmeri.

Ol bod ov dairekta bilong Nambawan Super i stretim toktok wantaim ol opisal bilong Treseri dipatmen pinis na ol i wanbel long wokbung wantaim na stretim dispela asua bilong gavman.

Tasol Mista Polye i wari olsem ol pablik sevan bai lusim

dispela bikpela mani.

"Gavman mas save olsem dispela mani em bilong ol manmeri. Em i mani bilong ol pipel. Ol dispela papa manmeri, planti bilong ol i pablik sevan, i bin sevim dispela kantri na mekim wok bilong gavman.

"Sampela ol bai risain na lusim wok. Tasol i no gutpela sapos ol i lusim dispela kainmani. Hat wok bilong ol bai lusnating,"Mista Polye i tok.

Nambawan Super i tok ol bod na menesmen i waru long ol memba bilong ol.

Em i tok gavman i mas peim K133 milien long larim ol memba husat i laik pinis long pablik sevis wok i kisim pinis mani bilong ol.

Ol bod ov dairekta bilong Nambawan Super i toktok wantaim ol opisal bilong Treseri Dipatmen long stretim dispela hevi.

8 mail bai kamap liklik hap taun

I kam long pes 1...

Long wankain taim, Gavana i tok ol i mekim Morata i kamap siti senta na ol pipel i mas senisim tingting bilong ol na luksave olsem ol i stap namel long siti.

"Dispela i laik lukim olsem ol pipel long Morata i mas kamap risponsibel na lusim ol kain nogut pasin. Ol i mas stap insait long senis tu," Gavana Parkop i tok.

Em i tok husat i gat taitel i

mas stat long developim graun bilong ol na mekim ol gutpela haus bikos em bai helpim ol long bihain. Tasol husat i no gat taitel i mas stat long kisim taitel nau bikos sapos ol i no kisim taitel na ol narapela developa i kam bai ol i no inap stopim ol.

Gavana i tok husat i laik kisim taitel na painim hat ol i ken go long NCD opis bai ol i helpim ol.

Friends love to share

One SIM for you & one SIM for your bestie, only on the friendlier network.

76003555 or 1555
connect@bmobile.com.pg

Connect with us on

www.bmobile.com.pg

Supporting PNG MADE

Bestie two SIM pack
K5
only

Polye amamas long ples balus i kirap

OPOSISEN Lida Don Polye i amamas long gutpela wok **Sivil Aviesen Minista, Davis Steven, i mekim long kirapim ol ples balus insait long PNG.**

Mista Polye, husat i bin stap pastaim minista bilong Sivil Aviesen aninit long pastaim gavman bilong Gren Sif Sire Michael Somare i tok, Mista Steven i bihainim ol plen em i bin mekim.

“Mi bin kamapim dispela ol plen bilong kirapim ol ples balus long kantri. Dispela ol plen i stap aninit long Nesenel Trensport Developmen Plen we mi bin stap minista bilong sivil aviesen na kamapim.

“Mi amamas long gutpela wok Minista Steven i mekim long bihainim dispela plen na kirapim ol ples balus bilong yumi long kantri.

“Mi amamas long gavman i kisim ol dinau mani long Asian Developmen Benk, JICA, Wol Benk, Yuropen Yunien na ol arapela sof lon o dinau.

“Mak bilong intres long dispela kain ol benk i no antap tumas. Tasol mi les long gavman i kisim dinau mani long ol komesal benk, we intres mak bai bikpela tru,”Mista Polye i tok.

Mista Polye i tok em i amamas taim Minista Steven i luksave olsem em i bin kirapim dispela plen.

“Minista Steven i luksave olsem mi bin kamapim ol dispela plen. Mi tok tenkyu long em i luksave long dispela ol plen bilong mi long kirapim trenspot sekta,”Mista Polye i tok.

Em i tok dispela plen bilong em i lukim Kagamuga (Mt Hagen), Hoskins (Kimbe), Gurney (Alotau), Nadzab (Lae) NA Tokua (Rabaul) ples balus i kirap.



Balus i pundaun long nupela Hoskins ples balus.

Yumi mas bilip long PNG

OPOSISEN Lida Don Polye i bilip strong long bihain bilong dispela kantri. Em i tok PNG bai gat gutpela sindaun long bihain taim.

“Mi save mekim dispela toktok olgeta taim. Mi bilip strong long dispela kantri. Dispela kantri bai gat gutpela fiutsa bilong em.

“Yumi mas bilip long yumi yet olsem yumi inap long mekim ol samting ol manmeri long arapela kantri i save mekim,”Mista Polye i tok.

Em i mekim dispela toktok bihain long Pablik Sevis Minista, Sir Puka Temu, i mekim wankain toktok las wik Fraide long PNG Institut ov Pablik Administresen (PNGIPA).

Sir Puka i tok yumi olgeta manmeri PNG i mas bilip long yumi yet, bilip long Papa God na bilip long kantri bilong yumi yet.

“Yumi mas bilip long Papa God. Em i namba wan samting. Yumi mas bilip long yumi yet olsem yumi PNG manmeri i fit long mekim ol arapela samting sampela manmeri long nara-pela kantri i save mekim.

“Na yumi mas bilip long kantri bilong yumi yet. PNG em i gutpela kantri bilong yumi,”Sir Puka i tok.



Ples i drai tasol mipela i stap...

Piksa i soim ol liklik pikinini i amamas na smail long kemra long Daru Ailan. Maski El Nino na bikpela hot san i bagarapim ples, daunim level bilong wara na sotim ol kaikai, ol dispela liklik pikinini i smail na amamas long kisim dispela piksa. *Poto: Aja Potabe*

'Tis the season to be jolly, What have you planned for this season? **Family feasts, Gifts, Travel Expenses?** Make this **season** merrier with a

BSP PERSONAL LOAN

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

320 1212 / 7030 1212 - 24/7
 servicebsp@bsp.com.pg
 www.bsp.com.pg

EMPNG i sapotim draut rilif

EXXONMOBIL PNG i wok bung wantaim ol komyuniti ogenaisesen na ol provinsal gavman long givim ol kaikai long ol lain i kisim bagarap long bikpela san long Hela na Westen provins.

Long Hela, EMPNG i givim K68,000 long PNG Yunaitet Sios long helpim na sapotim Hela Yunaitet Sios bai wok sait long Hela. Yunaitet sios bai wok wantaim Hela Provinsal gavman long toktok long hevi bilong kaikai na wara i sot we ol komyuniti i lukim.

Nesanel Disasta Senta (NDC) i tok orait long EMPNG long givim klin wara long ol komyuniti ogenaisesen olsem ol skul, klinik na sios.

Long helpim ol pipel long Westen provins, EMPNG i givim mani long baim olsem 40,000 kilogram bilong rais we ol i wok bung wantaim Salvation Army na Flai Riva provinsal gav-



Menesing Dairekta bilong EMPNG, Andrew Barry na tupela man i makim Salvation Army na Yunaitet Sios, Bob Haro na Bernard Kila wantaim ol rais kontena ol i laik salim i go long Westen provins.

man bilong Westen provins.

EMPNG bai sapotim tu Flai Riva Provinsal Gavman long sapotim long skelim rais long ol pipel i nidim.

Salvation Army Teritorial Patnasip Kodineta Bob Haro i tok tenkyu long EMPNG i helpim

na givim long sapotim disasta rilif long ol komyuniti i nidim.

'Salvation Army i amamas long wok bung wantaim EMPNG long givim disasta rilif long ol komyuniti we draut i bagarapim ol long PNG,' Mista Haro i tok.

Long wankain taim,

Menesing Dairekta bilong EMPNG, Andrew Barry i tok kampani i luksave long ol hevi dispela draut i mekim long kantri.

'Mipela i bin helpim long hap we mipela i ken long hap mipela i stap. Mipela i wok bung wantaim ol komyuniti ogenaisesen na ol provinsal gavman, mipela i ken luksave olsem sapot bilong mipela i go aut long olgeta pipel i nidim helpim,' Mista Barry i tok.

ExxonMobil PNG i amamas long sapot bilong Patricks Trensport husat i givim diskaun bilong baim ol rais na Consort Shipping husat i karim ol rais long sip nating.

'Insait long ol wok bung mipela i helpim ol komyuniti long was long ol hevi bilong draut na helpim ol long bildim gen laip bilong ol,' Mista Barry i tok.

PNG ran gut long han bilong O'Neill

PNG i ran gut long han bilong Praim Minista Peter O'Neill, pastaim praim minista Paias Wingti i tok.

Mista Wingti, husat i gavana bilong Westen Hailans Provins, i tok kantri nau i wok long lukim planti gutpela senis i kirap taim Mista O'Neill i kamap praim minista.

Em i tok insait long 4-pela yia tasol planti gutpela samting i kamap na ol pipel i amamas long O'Neill-Dion gavman.

"Ol rot, ples balus na sip bris i kamap gut. Dis-

pela gavman i wok long putim moa mani i go insait long kirapim rot, ples balus na sip bris," Mista Wingti i tok.

Em i tok rot, ples balus na sip bris em ol nambawan samting we PNG i nidim long senisim laip bilong ol manmeri, bringim ol gutpela samting i kamap insait na kirapim kantri.

"Mi ken lukim olsem futsa bilong PNG i stap gut tru. Ol dispela samting i namba wan samting we ol narapela servis i ken kamap.

Rot i stap gut na bis-

nis bai kirap. Ples balus i stap gut na ol turis bai amamas long kam long kantri bilong yumi.

Sip bris i stap gut na intenesenel treid bai gro moa.

Mista Wingti i tok insait long 4-pela yia tasol, gavman bilong O'Neill i putim gut tru ol faundesen bilong divelopmen na bihain taim bilong PNG i stap gut tru.

Em i mekim dispela toktok taim Mista O'Neill i opim nupela Kagamuga intenesenel ples balus long Mt Hagen.

Ol pipel i bung na kamapim bel isi

Tony Sapan i raitim

OL pipel bilong Zuen viles na Nielik klen bilong Masahet ailan long Lihir i kamap bung long stap gut wantaim long namba 7 de bilong Novemba bihainim oda bilong Nesanel Kot long sampela yia long ol bel hevi bihain long wanpela polis reid i kamapim bagarap long ol samting bilong ol.

Dispela polis reid i kamap bihainim ol hevi namel long ol pipel bilong Zuen na ol memba bilong Nielik klen antap long ol hevi long graun i kamapim bagarap long samting.

Kompensesen long ol samting ol i bagarapim i kam long tupela grup wantaim ol i stretim olsem hap bilong kot oda na bing bilong bel isi ol i mekim long kamapim gutpela sindaun.

Dispela bung i stat wantaim lotu bung wantaim gutpela toktok i kam long Pasta Philip Chan.

Em i bungim wantaim ol pipel bilong tupela grup long pre long bel isi na gutpela sindaun na ol i sekan.

Ol lain i toktok long dispela bung, i singaut long ol lain i kamap long gat gutpela tingting long

laip na long skulim ol yangpela bilong ol long lukim olsem ol na ol komyuniti bilong ol i gat bel isi na gutpela sindaun.

Dispela bung i pinis wantaim kaikai we ol i bin kilim sampela pik em ol i skelim wantaim kaikai bilong gaden i go long ol pipel i kamap.

Lihir Polis Stesin Komanda, Inspekta Eliasir Takir, Nimamar LLG Viles kot opisa, Demetrius Tapui na wanpela opisa i kam long Lihir Maining Eria Len onas Asosiesen i bin stap long dispela bung.

Ol i no printim na givimaut Lihir Niusleta

Tony Sapan i raitim

OL senis long ol wokman-meri bilong Newcrest Maining Limited i pasim wok bilong raitim komyuniti niusleta em kampani i save baim kost bilong en, Lihir llamel.

Taim Kampani i pinis long baim kost bilong raitim dispela niusleta em i bin stap tasol long ilektronik kopi insait long tupela yia i go pinis na dispela i min olsem ol pipel bilong Lihir bai i no

inap kisim tok klia long we ol i wok long divelopim risos bilong ol na ol i kisim wanem helpim long en.

Moa long tupela yia i go pinis ol i pinis long raitim dispela niuspepa bikos kampani i no inap moa long painim mani long baim kost bilong raitim.

I tru ol i wok long putim wantaim yet dispela niusleta, em i bin stap tasol long ilektronik kopi insait long intanet na email em i min ol pipel bilong Lihir na

husat i save bihainim divelopmen bilong Lihir Gol Main em ol i no inap go long intanet na email i no inap long kisim.

Em i save kost namel long K10 na K12,000 long raitim dispela niusleta insait long olgeta tupela mun tasol kampani i no moa gat mani long raitim.

Tingting long kisim helpim bilong ol narapela stekholda insait long projek long helpim long baim kost bilong raitim i no bin kamap gut.



Word Publishing Company Ltd

P. O. Box 1962, Boroko, NCD 111, PNG. Tel: (675) 325 2500 Fax: (675) 325 2579
Email: seovo@wantok.com.pg / word@wantok.com.pg

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)
PNG K220.00, Australia/New Zealand US\$110.00, Asia/Pacific US\$150.00
Rest of the World US\$210.00

NCD HOME DELIVERY

K0.80t per copy or K65.00 for two or more copies & Office pickup K52.00 per year for a copy.

Please send me _____ copy/copies of WANTOK for one year.

I enclose Kina/USD _____ as full payment.

Name _____

Postal Address _____

City _____

State/Province _____

(abbreviation)

Country _____ Zip/Postal Code _____

Street Address _____

Telephone _____ Fax _____

Email _____

Signed _____ Date _____

Publisher of



WANTOK
Niuspepa bilong Yumi ol PNG Street

Today
Monthly English paper

Noken lus tingting long baim WANTOK niuspepa today!!

K1 Tasol!!



EMPNG i givim wara long sapotim ol komyuniti



Plent Menesa bilong EMPNG, Murray Bell i sekhan wantaim het tisa bilong Papa Elemtri skul, Puro Bisia na ol man i makim Komyuniti Afes tim bilong EMPNG na Laba Holdings.

TAIM Papua Niugini (PNG) i go het long lukim strongpela san, Exxon Mobil Limitet (EMPNG) i givim nupela risos long helpim ol komyuniti klostu long LNG Plant.

EMPNG i givim K150, 000 long wanpela inisitiv long givim klinpela wara long 11-pela praimer skul na tripela helt klinik long Porebada, Boera, Papa na Lealea.

Dispela wara projek bai lukim 100, 000 lita bilong ol wara saplai long ol viles long Desemba.

Long sapotim dispela, bai ol i putim ol wara tenk long Porebada Elementri na

Salvation Army Literesi skul, Lealea Elementri skul, Papa Komyuniti Pri-skul na Bogi Literesi skul.

LNG Plant Papa graun kampani, laba Holdings Limitet bai putim ol wara tenk, karim aut plaming wok na lukautim wok bilong karim aut wara.

Dispela helpim i kamap taim tim bilong EMPNG i raun na lukim ol 4-pela viles ausait long LNG plant olsem ol hap bilong kisim wara i drai na go daun stret.

Plant Menesa bilong EMPNG, Murray Bell i tok kampani i wok hat long helpim long tok tok long dispela hevi.

'Mipela i tingting

long daunim hevi long ol dispela eria long givim wara na putim ol wara tenk long helpim ol helt klinik na skul long go het na operet.

Long wok wantaim Laba Holdings Limitet, mipela i go moa yet long karim aut dispela projek na putim ol tenk na givim wara bipo long pinis bilong dispela yia,' Mista Bell i tok.

EMPNG i karim aut ol draut rilif wok long Hela na Westen provins. Olsem 40, 000 kilo bilong rais ol i givim long Salvation Army bilong Westen provins na K68, 500 ol i givim long PNG Yunitet Sios long helpim Hela.

Ol Kieta pipel tok sori long ol Siwai

MOA long 200 pipel i bin bung long ples Upakori long Siwai long tok sori na sekan long ol hevi na dai i kamap long taim bilong Bogenvil pait.

Long namba wan taim, ol eks paitman bilong Kieta long Sentrel Bogenvil i bin tok sori long ol famili bilong ol Siwai lida we ol i bin kilim ol moa long 20 krismas i go pinis, long trabel ol i bin kolim long "Siwai Kraisis".

Tripela awa seremoni i bin kamap long Disemba 4 we ol eks paitman (BRA), ol resistens paitman na ol famili long Siwai we ol lain bilong ol i bin lus long han bilong ol paitman, tasol ol (family na ol hauslain) i no bin save rot ol i dai long en, o wanem hap ol i planim ol.

Singsingketu (tokaut long ol hevi) seremoni i bin bungim wantaim pastaim wanpela strongpela BRA komanda long Sentrel Bogenvil, Chris Uma, na 30 eks paitman bilong Kieta, Wakunai, Wisai na sampela long Siwai na ol famili bilong ol lain we ol eks paitman i bin kilim dai ol.

Insait long bikpela Bogenvil pait, "Siwai Kraisis" i bin kirap long politikel na lidasip resis long Siwai yet bihain long ikonmik bloket we PNG gavman i bin putim long ailan.

Dispela Siwai Kraisis i bin nogut tru na i bin brukim 15,000 pipel long Siwai Distrik i go long resistens fos sait (not is) na ol narapela hap long BRA sait (saut-wes).

Moa long 200 pipel i bin kisim bagarap we sampela dai, sampela i lus yet na sampela i bin kisim bikpela bagarap, tasol ol i stap laip yet.

"Mi bin liklik taim papa bilong mi, Anugu i bin dai. Mi no bin gat sans long em i lukautim mi na soim stia na laik pasin we papa i givim long pikinini bilong em. Min a ol arapela brata susa bilong mi i bungim bikpela hevi taim yupela i kilim dai papa bilong mipela.

Mi no gat kros long yu Chris Uma. Mi laikim yu, tasol mi askim yu long tokim mipela trupela stori

we yupela i kilim papa bilong mi, watpo na wanem hap yupela i planim em," Cornelius em wanpela pikinini bilong leit Tony Anugu i tok.

Coleen em pikinini meri bilong leit Benjamin Kirape, i krai na askim ol ansa long ol kweaten em i bin troim i go long ol.

"Mi bin gat tripela krismas tasol na mi no bin gat sans long papa i lukautim mi.

Mi no bin save long lav, lukaut, skul na stap wantaim papa olsem famili. Watpo ol i kilim dai em? Husat i bin kilim em? Em i stap we? Mi laik bai mipela i planim gut papa bilong mi. Plis kisim em i kam long ples," Coleen i bin krai na tok insait long seremoni.

Moa long 2,000 pipel i bin bung na harim stret ol trupela infomesen long lus na dai bilong ol Siwai lida long 1992.

Ol i bin kidnepim na kilim leit Tony Anugu i bin pastaim Palamen Memba bilong Saut Bogenvil insait long Siwai Kraisis.

Ol narapela 5-pela we ol i bin kisim ol wantaim leit Mista Anugu em, Benjamin Kirape, pastaim Deputi Edministreta wantaim Bogenvil Edministresen, praivet akauntan em Joe Rangai, yut lida em Micheal Pareu, na narapela yut lida em Joe Mo'otung, em ol i bin kilim ol long Panguna taim ol narapela em ol i bin kilim ol long Siwai.

Stat long dispela taim, ol lida ya i bin lus long 1992 i kam inap long "Singsingketu Seremoni" taim, belkros na pasin birua i save stap namel long ol Siwai na Panguna pipel.

Dispela i bin wanpela bikpela seremoni bikos em i statim hiling proses long ol viktim.

Atonomas Bogenvil Gavman na Australia aninit long Bogenvil Pis Bilding Program (BPBP) na Strongim Pipol Strongim Nesen Program (SPSN), i sapotim rikonlisiesen o belgut na sekan pasin long Siwai aninit long demokretik proses we ol man na meri i stap insait long proses.



Hankais i go long Hansut, man i go pas long Singsingketu, Mathew Kaveranu bilong Kieta, eks-paitman, Chris Uma, Angellius Anugu, pikinini bilong leit Anugu Anugu na Martin Tumuki, Siaman bilong Siwai Distrik Pis na Sekyuriti Komiti. Chris Uma i bin luksave olsem em i bin kamapim 'planti hevi long tupela (Kaveranu and Anugu) tasol bihain long Singsingketu, olgeta i tok ol bai wok strong long kamapim gutpela sindaun na bel gut long ol komyuniti. Foto: SPSN

Manu maket i no wanpela fomol maket

NESENEL Kepital Distrik Komisen i no gat plen long mekim Manu Maket i kamap wanpela fomol maket ples.

Siti Menesa, Leslie Alu i mekim kli na i tok strong long ol lain bilong salim ol samting bilong ol long Manu maket olsem em i no wanpela ples we gavman i laik putim maket long en. Em i mekim ol dispela toktok bihain long planti toktok i bin kamap long ol lain husat i save salim samting long Manu maket, olsem ol i lusim kastoma bihain long TST Malaoro Supamakot i bin paia.

Ol lain bilong maket i bin putim komplek i go long NCDC olsem bihain long bikpela TST stua, Malaoro i bin paia, ol kastoma bilong ol i no kam gut long maket.

Mista Alu i tok ples maket i kamap nau em i no hap bilong maket olsem na ol lain i brukim lo long sindaun na maket long dispela hap.

"Bikos dispela maket i no bihainim lo, NCDC bai rausim olgeta kain pasin bilong salim na baim samting ausait long ples kli, olsem na ol lain husat i gat ol samting bilong



Leslie Alu - Nesenel Kepital Distrik Komisen Siti Menesa Foto: Wantok faile foto.

salim i mas go long ol narapela maket ples long siti long wokim maket bilong ol," Mista Alu i tok.

Em i tok olsem i bin gat luksave long Manu maket bikos long wanem samting ol i save salim long hap tasol em i olsem infomol maket tasol long helpim Malaoro TST supamakot.

"Em i no gat ol sevis we ol fomol maket i mas gat olsem sekyuriti, wara, toilet, ka pak, gutpela banis,

haus bilong maket, spes bilong maket, ol tebol bilong maket, ples bilong putim ol kago bilong salim samtingna ples bilong troimoi pipia. Olsem na mipela i lukim olsem em i wanpela infomol maket tasol," Mista Alu i tok.

Manu Maket i bin kamap bikpela na i save givim sevis long ol lain i stap klostu olsem Korobosea, Taurama, Sabama, Kaugere na KilaKila na ol narapela lain long siti i

kam inap long las mun taim bikpela TST Malaoro Supamakot i bin paia.

Siti Menesa i tok em i no gutpela samting long supamake t i paia na i bagarapim sindaun na wok bilong Manu Maket na ol lain husat i save kisim sevis long en.

"Tasol Komisen i no laik long kamapim dispela hap gen olsem wanpela maket and mipela i laikim ol lain husat i save salim ol kaikai samting long dispela hap long go long ol narapela hap bilong siti," Mista Alu i tok.

Ol lain bilong maket i bin autim wari bilong ol long ol niuspepa olsem supamakot i save bringim ol kastoma long ol tasol nau em i go pinis, na ol tu i lusim ol kastoma.

Long dispela taim tu Siti Menes i tokaut long ol plen bilong Komisen long stretim ol siti maket na em bai stat wantaim Gordons kumu maket. Olgeta lain bilong Gordons maket bai i go long Boroko maket.

Em i tok moa olsem taim NCDC Maket divisen i redi ol bai go het long pasim Manu maket, olsem na ol i laikim ol lain bilong salim ol samting long hap i mas long ol narapela siti maket klostu.

Pe bilong ol tisa i no redi yet

EKTING Seketeri bilong Edukesen, Dokta Uke Kombra i tok kliia long as bilong pe bilong ol tisa na pablik seven i kisim longpela taim las fotnait.

Dokta Kombra i tok pe bilong ol tisa i kisim longpela taim bikos long

senis i kamap long rot bilong stretim ol pe wantaim Dipatmen bilong Fainens.

Olpela rot bilong Alesco Sistem i save givim aut ol sek long olgeta komesel benk bilong ol kampani wantaim benk akaun long kain kain

ol komesel benk. Ol perol opisa i bungim ol dispela sek na salim i go long wan wan komesel benk.

'Tasol long Pe namba 25/2015, Alesco i no bin givim aut wanpela sek bilong kain kain ol komesel benk.

Long dispela, Dipatmen bilong Fainens i ogenaisim wanpela intenel trensefe bilong ol mani wantaim Benk bilong Papua Niugini (BPNG) long ol komesel benk,' Dokta Uke i tok.

Em i tok moa olsem dispela

eksen we Dipatmen bilong Fainens em i stap long lain wantaim Kina Autometet Trensefe Sistem (KATS) bilong BPNG we ol i makim long rausim sek pemen na ol i ken salim mani long ilektronik trensefe.

5-pela PNG i stap insait long onlain kos

UNESCO Intanesenel Institut bilong Edukesen Plening (IIEP) i oge-naisim wanpela distens edukesen kos long Edukesen na Plening bilong Sefti na Risiliens na Sosol Koesen long Oktoba 19 inap Desemba 18 long 2015.

Eksekutyutiv Dairekta bilong UNESCO Wing insait long Dipatmen bilong Edukesen, Andrew Angobe i tokaut olsem ol disasta na ol pait i ken gat nogut bagarap long ikononik na sosol developmen bilong ol kantri.

Mista Angobe i tok edukesen sekta plening proses i ken sapatim long ol intavensen bi-

long daunim birua we i karamapim pasin bilong lukim na skelim, ol ime-naisim i save kamap, na tu ol bikpela disasta o pait.

Dispela longwe kos i makim long strongim spes bilong edukesen sekta long plenim ol rot we edukesen atoriti i ken karim aut sefti, banisim, na sosol plen long ol nesenel plening proses.

Insait long distens edukesen, trening i stap bilong bikpela namba bilong ol woklain.

Dispela lukluk i go het long developmen bilong ol institusen na kirapim tim.

Moa olsem 50 pipel i bung wantaim long 11-

pela kantri i long dispela onlain kos. Ol kantri em Uganda, Kenya, Saut Sudan, Mauritius, Afganistan, Papua Niugini, Kambodia, Pilipines, Myanmar, Ajentina na Guyana.

Ol kam long ministri bilong edukesen, na ol developmen patna olsem UNICEF, RTI Intanesenel, save the children, na Plan International.

Mista Angobe i amamas long tokaut olsem PNG i gat 5-pela opisa i stap insait long dispela onlain kos.

Em i tok Esia Pasifik Rijnjel Opis bilong UNICEF long Bangkok, Thailand i baim

\$US500.00 kos fi bilong ol PNG pipel i stap insait long dispela.

Dispela em i namba wan samting na Mista Angobe i amamas long ol gutpela toktok i kamap long dispela.

Em i tok tenkyu long Ekting Seketeri bilong Dipatmen bilong Edukesen, Dokta Uke Kombra na memba bilong menesmen tim na lidasip bilong ol.

'Planti bilong ol dispela sans bai kamap na em i laik bilong mi long kamapim hap bilong ol pipel bilong PNG long kisim helpim na go het long givim long developmen bilong kantri,' Mista Angobe.

Nupela klasrum na klinik long Munji



Minista Maru i bin opim dispela nupela klasrum long Munji Komyuniti skul long Is Sepik provins.

MUNJI praimereri skul i opim 4-pela nupela klasrum insait long wanpela bilding, na komyuniti helt pos long Munji eria long Is Sepik provins.

Minista bilong Tred Komes na Indastri na memba bilong ol, Richard Maru, i opim tupela nupela fasiliti o bilding.

Minista Maru i tok aut olsem edukesen em i namba wan polisi bilong Yangoru-Saussia distrik long wanem ol bai go het long stretim olgeta fasiliti olsem ol klasrum long olgeta skul insait long distrik.

Em i tok aut olsem neks yia, Distrik bai opim 5 yia developmen plen we bai putim God namba wan, edukesen

namba tu na helt namba 3.

'Long las tupela yia olsem memba bilong Yangoru-Saussia Distrik, mipela i tromoim totol mani olsem K6 milien long edukesen tasol aninit long konstitusen mani bilong distrik. Dispela em bikpela mani we distrik i givim long skul,' Minista Maru i tok.

Em i tok aut long las tupela yia, nesenel gavman i bin givim K30 milien long Yangoru-Saussia distrik we K6 milien i go long edukesen sekta long soim olsem edukesen na human risos em i bikpela samting long developmen bilong distrik.

Minista Maru bai opim narapela klasrum insait

long wanpela bilding long Mongan Komyuniti skul neks wik. Ol bai i givim mani long statim konstraksen bilong 4-pela long wanpela bilding bilong Sembo Komyuniti skul, Isten Komyuniti skul, Kumbuhun Komyuniti skul, Nindinumbo Komyuniti skul na Kusambuk Komyuniti skul.

'Sapos yumi laik kamap namba wan long akedemik standet, yumi mas gat ol namba wan tisa, namba wan fasiliti na gutpela envairomen. Lo na oda, ol namba wan bilding olsem ol haus na klasrum bai pulim ol namba wan tisa na bai ol i givim gutpela sevis long skul,' Minista Maru i tok.

U.S skul i pulim ai bilong ol PNG sumatin

PLANTI Papua Niugini (PNG) kisim anda greduet stadi taim long Yunaitet Stet (U.S) i no olsem bipo.

Dispela ol i tokaut long anuel Open Doors ripot bilong 2015 we Institut bilong Edukesen i pablisim long taim bilong Intanesenel Edukesen Wik.

2015 Open Doors ripot i soim 10 pesen i go bikpela long namba bilong ol Papua Niugini i stadi long U.S long 2014 inap 2015. Planti namba olsem 76 pesen bilong ol

dispela sumatin i kisim anda greduet stadi taim long ol Masta na Doktret program.

Long 2010 inap 2015, i bin gat 58 pesen namba bilong ol PNG sumatin i stadi long U.S i go bikpela.

A m b a s e d a Walter North i tok, 'Mi amamas long lukim planti gutpela pipel long Papua Niugini i stadi long Amerika.

Mipela i gat ol namba wan edukesen institusen long wol. Edukesen long

Amerika em i isi long baim na i gutpela tru.

Mipela tokim ol yangpela pipel long lukim Amerika, mipela i amamas long helpim na kamapim driman bilong ol.'

U.S Embasi insait long Pablik Afes seksen, i redi long helpim ol sumatin na papamama long PNG wantaim ol askim bilong ol long stadi long U.S.

W a n p e l a edukesen ed-vaising senta i op long ol olgeta de bilong skul long

Yunivesiti bilong Papua Niugini (UPNG). Ol sumatin i ken kisim ol infomesen na bungim Edukesen Ed-vaiva bilong USA long ol sans bilong stadi ovasis.

Mipela i amamas long ol tes olsem Greduet Rekot Eksemisen (GRE) na Tes bilong Inglis olsem Foren toktok (TOEFL) i stap long PNG. Long moa infomesen long stadi long U.S sekim Edukesen USA PNG long Facebook.

Season's Greetings

KUMUL PETROLEUM Holdings Limited

The Board, Management and Staff of Papua New Guinea's National Oil and Gas Corporation - Kumul Petroleum Holdings Limited, would like to extend this Season's Greetings to the 7 million plus people of Papua New Guinea who are the ultimate shareholders of KPHL; its business partners and other stakeholders a **Merry Christmas and Prosperous 2016**

Namba wan Onlain Tok Pisin sumatin i pinisim kos

I kam long DWU Komyuniti Infomesen Senta

WANPELA Sosaiti ov Divain Wod Misineri (SVD) memba em i paonia long kisim setifiket long fri onlain Tok Pisin kos long wanpela nesanel yunivesiti long dispela kantri.

Pater Philip Gibbs, SVD, i bin kisim setifiket bilong em taim em i pinisim "Online Tok Pisin Foreigners" kos long Divain Wod Yunivesiti long Madang las mun.

Ol woklain na ol sumatin long

Fleksibel Lening Senta long DWU i bin witnesim Pater Phil taim em i kisim setifiket bilong em.

Dispela "Online Tok Pisin Foreigners" paonia kos we DWU i ofaim na i stat long dispela yia i pulim ol sumatin long olgeta hap bilong wol long enrol na stadim namba tu nesanel lenguj bilong PNG, Tok Pisin, long ples yet bilong ol.

Profesa bilong Linguistik Risets na Onlain Eduketa, Craig Volker taim em i prisanim setifiket long Pater Phil i bin tok Pater ya em i



Laibreri Dairekta, David Lloyd, Pater Phil, Zuleika Winfrey na Profesa John Ellison Burton i sindaun long tebol na harim Profesa Volker i toktok long kos. Ol Poto: DWU



Pater Philip Gibbs, SVD, i smail taim em i kisim setifiket.

namba wan sumatin long 83 narapela intanesenel paonia sumatin i enrol long kos, husat i pinisim kos we i no winim 12-pela mun.

Profesa Vilker i tok ol i wokim kos long ol sumatin i ken wokim insait long 12-pela mun na i gutpela long ol foren o ovasis sumatin i laik lainim Tok Pisin long fleksibel lening rot, na ol i ken mekim long taim bilong ol yet.

Em i tok ol ovasis sumatin i no nap stap long PNG long lainim na wokim Tok Pisin kos, no gat.

Em i tok as tingting long dispela kos em long strongim komyunikesen bilong ol ovasis lain wantaim ol lain bilong PNG na ol ovasis lain i ken kli na save gut long ol PNG lain na wankain tu long ol PNG lain na ol ovasis lain.

Profesa Volker i tok namba tu as

tingting em long mekim Tok Pisin i isi long ol ovasis lain i wokim risets long PNG.

Em i tok dispela i tru long ol yunivesiti sumatin i stadi long antropoloji long Australia, Spain, Germani, Ireland na ol arapela kantri moa husat i enrol nau long kos ya.

Onlain Eduketa, Zuleika Winfrey, husat i wok long helpim Profesa Volker i tok ol miks reis lain i kamap long marit namel long PNG na ovasis i sindaun long kos i kisim dispela kos tu.

Em i tok dispela kos i helpim ol dispela lain pipel long save gut log ol hauslain bilong ol taim ol i komyuniket gut long Tok Pisin.

Taim dispela em i namba wan kos we DWU i ofaim long onlain, em i givim planti lening ekspiriens

long DWU Onlain Edukesne Dipatmen na yunivesiti bikos neks yia, DWU bai ofaim Poet greduet kos long onlain.

Profesa Volker i amamas long ofaim ol onlain kos long PNG long helpim ol PNG lain i rait gut long Tok Pisin na tu, long tanim gut ol samting long tok Inglis i go long Tok Pisin.

DWU em i wanpela nesanel yunivesiti we i op long olgeta, i sevim sosaiti long kwaliti risets, lainim, komyuniti skul na go pas long pos greduet kos onlain.

Sapois yu laik kisim moa save, yu ken kontekim DWU Pablik Rile-sens na Alumnai Kodineta, Rhonda Clement long telipon namba 4222937 or email rlclement@dwu.ac.pg

Tuna kening speselais trening long Fiji

SAMTING olsem 18 keneri na nesanel pis inspekta bilong Fiji, PNG na Solomon Ailan i bin sindaun long tupela wik speselais trening long Levuka, Fiji.

Dispela kos bai helpim ol long lukim olsem prodaksen bilong ken o tin tuna long rijon em inapim intanesenel standet we i seif long man i kaikaim long en.

Yuropien Yunien (EU) i bin go pas long dispela Temol Prosesing naReguletori Odit trening wantaim sapot bilong Developmen bilong Tuna Fiseris long Pasifik Projek (DevFish2) we Pasifik Komyuniti (SPC) i go pas long en.

Long tok welkam long 18-pela koslain, Lomaiviti Provinsel Edministreta, Ekimi Rokoduru, i bin dispela trening i bikpela samting long tuna

prosesing bisnis long Fiji na lokal ikonomi.

"Dispela rijinol trening we SPC i karimaut bai helpim gut operesen bilong Pasifik Fishing Company long Levuka, long sait bilong sapotm save na wok bilong ol asples woklain long fektori," Mista Rokoduru i tok.

Dispela tupela wik trening i bin givim save long ol opisa long rot bilong prosesing pis long lukim olsem hai tempetsa i mas stap na pinis prodak em inapim kwaliti standet we em mak bilong intanesenel rikwaiamen.

Jonathan Manieva em Developmen opisa bilong SPC's DevFish, i tok dispela trening i kamap long taim stret taim tuna prosesing industri long Pasifik rijon i wok long groa.

Long ripot bilong Forum Fisheries

Agency (FFA) 2015 Economic Indicators Ripot, tuna prosesing maket sea bilong ol FFA memba kantri we PNG i memba tu long en, mak i dabel long 100,000 ton hevi bipo long 2013 i go antap long 210,000 ton long 2014.

Taim industri i gro, wok long ol eria bilong prodaksen lain i groa. Dispela teknikel na speselais trening bai helpim gut ol lain bilong yumi na ol i ken mekim wok we ol speselais lain bilong ovasis i save mekim. Dispela i strongim na sapotim wok bilong ol lokal long mid menesmen level long indastri," Mista Maneava i tok.

"Seif prodaksen bilong ken o tin tuna em i bikpela hap long nutrisenel kontribusen long pis na fud sekuriti long ol pipel bilong yumi. Na strongim sans long wok long ol

asples long piseris sekta i kontribuit tu long ol wan wan na ol hauslain na ol famili" Mista Manieva i tok.

Ol lain i sindaun long woksop i bin gat prektikel trening long tuna prosesing plent fektori long Levuka.

Menesing Dairekta bilong PAFCO, Brett Carter i tok kain trening i bikpela samting bikos ol ken prodak long rijon em ol i save salim i go long ol ovasis maket olsem long EU na Amerika. Na ekspot rikwaiamen em ol ken tu i mas inapim ol standet rikwaiamen.

Em i tok temol prosesing long ken pis em i hai risk operesen na ol lain i wok long dispela eria i mas gat teknikel kwalifikesen na tu, ol i mas inapim ol standet kening proses na lukim olsem pis i seif long pablik i kaikaim.

PNG PM i mas stopim ol narapela foren loging bisnis

I kam long ABC

WANPELA komuniti lida na papa graun bilong Pomio long Is Nu Briten i tok Praim Minista, Peter O'Neill, i mas stopim tu ol foren loging kampani husat I wok long katim nating diwai long ol graun bilong ol pipel.

Nobert Pames i mekim dispela toktok bihain long Mista O'Neill ibin putim wanpela "stop wok oda" long tupela loging kampani bilong ol narapela kantri long wanem, tupela ibin brukim enviromen loa biong kantri.

Long wik igo pinis, Praim Minister O'Neill, i bin putim aut dispela oda bihainim ol wok painimaut olsem dis-



Ol diwai em ol i katim aninit long ol wok loging bisnis. Poto: ABC

pela tupela kampani, Yema Gaiapa Developers na Viva Success Limited ino bin kisim tok orait na igo katim ol diwai.

Ol papa graun ibin wok long tokaut long ol wari olsem dispela tupela kampani ibin mekim arere long

boda bilong Oro na Morobe Provinsas.

Mista Pames itokim Redio Australia olsem, em i amamas long dispela tingting bilong Mista O'Neill, tasol emi mas lukluk tu long ol narapela ples long kantri.



Nupela Badilli Polis Stesin na Bareks i op

Tupela polis konstabel sanap fran long polis stesin na bareks long Badilli Polis stesin.

Long Desemba 11, 2015 Minista bilong Polis, Robert Atiyafa, i bin opim nupela Badilli Polis Bareks wantaim Memba bilong Pot Mosbi Saut na Minista bilong Spots, Justin Tkatchenko, RPNGC Eking Komisina Jim Andrews, Australia Federal Polis Komisina, Andrew Colvin na ol lain bilong Pot Mosbi Saut iletolet i bin bung na opim nupela Badilli Polis Stesin na Bareks.

Rhodes (PNG) Limited i bin disainim gen polis bareks long em bai givim gutpela ples bilong stap bi-

long ol polis man na meri. Em i gat gutpela haus kuk na ples bilong wasim klos wantaim ples bilong sindaun malolo. Nupela bareks bai inap long kisim 22 singel opisa wantaim wanpela hap bilong wasim klos long wan wan bilong tupela plua. Em bai gat haus kuk tu na ablusen o toilet long narapela hap bilong haus. Memba bilong Saut, Justin Tkatchenko, i bin putim mani bilong stretim ol polis sel insait long stesen na long stretim bikpela hap eria ausait long putim ples bilong

pilai na pareid graun. Em i putim 300 ol sia lain i go antap bilong ol lain i ken sindaun na was long lukim ol gem. **M i n i s t a** Tkatchenko i tok tenkyu long Australia Gavman, ol pipel bilong Australia na Australia Federal Polis na em i tok dispela wok bilong stretim polis stesin em inap long kamap longtaim yet tasol em i no bin kamap. “Em i no gutpela long yumi wet long ol polis opisa long wok hat sapos ol i no gat gutpela ples bilong stap. Em i gutpela long AFP aninit long Wok

Wantaim patnasip program wantaim RPNGC i bin inap long helpim mipela wantaim dispela bikpela infrastraksa.” Olgeta wok bilong Badilli Polis Kompleks i bin stap long mani mak bilong K2.7 milien. Memba bilong Pot Mosbi Saut, i bin putim K480,000 bilong dispela na PNG-APP Patnasip invesmen i putim K2.2 milien. Stat long 2013, AFP aninit long PNG-APP Wok Wantaim patnasip i putim pinis K37 milien long polis ikwipmen na ol infrastraksa projek.

Olpela Badilli Polis bareks.



Olpela Badilli Polis stesim na pereid graun.

US DPAA Solomon Ailan Ripatriesen

YUNAITET Stets Gavman i bin holim wanpela seremoni bilong rausim ol bun bilong ol soldia bilong US ami long Wol Woa II long Solomon Ailan na long kisim i go bek long Henderson Intenesenel Epot long Honiara, dispela wik. Ol bun bilong ol dispela soldia bai i go bek long kantri bilong ol yet. Ol U.S. Depatmen bilong Difens Prisona ov Woa/Mising in Eksen (POW/MIA) Akauting Ejensi (DPAA) i bin mekim wanpela wok bilong painim ol lain i bin lus long taim bilong woa na ol i no bin painim ol bipo. Liklik seremoni i bin mekim luksave long strong bilong ol dispela soldia husat i bin lusim laip i kamapim strongpela wanbel namel long ol pipel bilong Yunaitet Stes na Solomon Ailan. U.S. Embeseda Walter North, Solomon Ailan Minista bilong Foren Afes. Milner Tozaka,



U.S. Dipatmen ov Difens wokman i wokim ripatriesen ekseisais long Henderson Fil long Honiara, Solomon Ailans.

U.S. Konsula Ejen Keithie Saunders, na ol lain bilong diplometik misin i bin stap long witnesim dispela seremoni long Henderson Fil long Tunde, Desemba 15. Seremoni i kamap bihain long wanpela gutpela wok painimaut na long kisim bek bun bilong soldia we i bin kamap long Guadalcanal na long Honiara eria olsem DPAA wokman i bin wok long painim, kisim bek na laboratori operesen long luksave long ol Amerika soldia we ol i no bin painim ol bipo. Embeseda North i tok tenkyu long nem bilong ol lain husat i dai long pait. Em i tok, “Tude mipela i onaim ol wanwok bilong mipela husat i dai longwe tru long asples bilong ol na husat yumi no bin save long ol. Yumi onaim ol na ol na famili bilong ol na olgeta pipel bilong Amerika i save olsem mipela i gat bikpela tenkyu long wanem kain sakrifais ol i bin mekim. “Long kain taim we kantri bilong yumi i wok long salim yet ol pikinini man na meri bilong mipela i go long olgeta hap kona bilong dispela graun, bung bilong yumi long hia tude em i gutpela taim bilong yumi tingim wanem kain sakrifais ol i bin mekim long yumi.” Embeseda North i tok moa olsem U.S. em i gat strongpela tingting long DPAA misin. Em i tok tenkyu long wanbel wok bilong Gavman bilong Solomon Ailan na Nesenel Musium, na long ol pipel.

PNG POWER Ltd Stop Self wantaim Elektrisiti!

OL NOGUT KRISMAS LAIT




OL GUTPELA KRISMAS LAIT




TOKSAVE BILONG PNG POWER I GO AUT LONG GENERAL PABLIK OLSEM SAMPELA STOA I WOK LONG SALIM OL KRISMAS LAIT WE OL I PUTIM TAMBU LONG OL.

OL DISPELA LAIT I NOGAT BIKPELA PLASTIK KARAMAP LONG OL NA TU OL PLAK I NO GUTPELA. BAIM TASOL KRISMAS LAIT I GAT OL BIKPELA PLASTIK KARAMAP LONG WAIA NA OL GUTPELA PLAK.

ASKIM OL PAPA BILONG STOA LONG SETIFIKET PEPA I GAT TOK ORAIT BILONG PNG POWER LONG OL KRIMAS LAIT SAPOS YU TINGTING PLANTI.

Pliis, ripotim olgeta wari na hevi bilong pawa long 24 hour kol senta long telepon namba 7090800,76535261, 76535272. Email:callcentre@pngpower.com.pg

Edukesen i no save stop

EDUKESEN i no save stop. Yes, dispela em i tru tumas. Maski yu marit, kamap papa o mama bilong planti pikinini na kamap lapun, tasol edukesen bai no inap stop. Ting ting na plen bilong ol manmeri yet tasol i save stopim edukesen.

O nogat, edukesen bai stop taim wanpela man o meri i dai na lusim dispela graun.

Dispela tingting na toktok i bin kirapim bel bilong wanpela papa, husat i gat 14 pikinini long kam bek gen long skul na kisim nupela save long mekim gut ol wok bilong gavman long nupela Hela Provins.

Hela em i nupela provins tasol em i no gat planti save manmeri long kirapim provins. Dispela tingting i bin kirapim bel bilong Olobe Hiru long kam skul long PNG Institut ov Pablik Administresen (PNGIPA) long Pot Mosbi.

Krismas bilong em i 51 yia na planti ol manmeri husat i gat dispela kain krismas i save ting ol lapun pinis na ol i save lus ting ting long kam bek long skul.

Tasol em i no wari long dispela. Em i bin gat strongpela tingting stret long skul na dispela diriman bilong en long skul moa na kisim nupela save i karim kaikai las wik tasol.

Mista Olobe i lus tingtig long narapela ol wok em i save mekim olsem famili man na lida man long ples. Em i kilim yia 2015 long PNGIPA na las wik Fraide hat wok bilong em i karim kaikai. Mista Olobe i greduet wantaim tupela diploma.

Em i kisim nambawan Diploma long Pablik Administresen i kam long PNGIPA na namba tu Diploma long Gavman Menesmen i kam long Canberra Institut ov Teknoloji long Australia.

Ol meri, pikinini, na famili bilong en i bin kam lukim greduesen bilong en na em i bin amamas stret olsem em i kam skul gen long kisim save.

“Dispela em i wanpela de bilong mi long amamas. Mi amamas stret long kisim tupela diploma pepa.

“Mi bai go bek long provins (Hela) na yusim dispela save long kirapim nupela provins bilong mi,” em i tok.

Mista Olobe i tok tenkyu long Hela Provinsal Administreta William Bando long sapotim em na narapela 5-pela poroman bilong em long kam skul long PNGIPA.

Em i tok pastaim het bilong em i no bin kliia na op gut long save olsem wanem sistem bilong gavman na pablik sevis i save ran.

“Nau het bilong mi i op. Mi kliia gut stret long olsem wanem pablik sevis sistem bilong kantri i ran. Mi amamas long Hela Provinsal Administreta William Bando i sapotim mi long kam skul gen.

“Na kisim save pinis na nau bai mi go bek long Tari na wok wan-



Mista Olobe i kisim Diploma pepa long Pablik Sevis Komisina bilong Australia, John Lloyd.



Em i amamas de bilong Mista Olobe (namel) wantaim tupela poroman bilong em.



Mista Olobe i sanap wantaim ol famili na kisim piksa.



Mista Olobe i sekan wantaim wanpela skul meit bilong em.

taim provinsal gavman long kirapim nupela provins.

“Mi laik tok tenkyu long ol leksera bilong PNGIPA na tu ol leksera i kam long Australia. Ol i lainim mi gut tru stret na mi amamas tru.

“Mi laik tok tenkyu long arapela 5-pela poroman bilong mi, we Hela Provinsal Gavman i bin sponsaim mipela,” Mista Olobe i tok.

Ol narapela poroman bilong em we Hela Provinsal Gavman i bin sponsaim ol em Robert ‘Turumbu’ Himuku, Dickson Akoma, Peter Hariki na Samson Gurel. Ol tu i greduet wantaim las wik Fraide na kisim pepa bilong ol.

Mista Olobe i bin bon long yia 1964 long Tari, Hela Provins. Em i gat 4-pela meri na 14 pikinini.

Mista Olobe i bin mekim gret 1 - 6 long Munima Komyuniti Skul long Tari. Long 1978 -1981 em i bin go mekim gret 7 - 10 long Tari Hai Skul. Em bin pinisim gret 10 na em i bin wok wantaim ECPNG Misin long ples Halongali long Tari. Em bin wok wanpela yia tasol na em i lusim dispela wok na joinim PNG Medikel Risets Institut (PNGIMR) long Tari haus sik.

Long 1983 - 1996, Mista Hiru i wok wantaim ol PNGIMR long Tari haus sik aninit long Medikel Risets Yunit.

Long yia 1997, Mista Olobe i lusim wok wantaim PNGIMR na em i bin wok wantaim Tom Tomiape, husat i dai pinis. Mista Tomiape bin stap Memba bilong Tari-Pori na em i bin kisim Olobe olsem projek opisa.

Mista Olobe i bin kilim 5-pela yia wantaim Memba na bihian long yia 2002 em i yet i bin tingting long sanap long liklik lokal level politiks insait long Tagali LLG, Tari.

Em i bin ran long kamap lokal kaunsila na em i winim LLG kaunsil sia bilong Pii-Nagia kaunsil wot insait long Tagali LLG, Tari. Em i lusim dispela LLG kaunsil sia long yia 2007 na em i mekim ol sampela wok bilong em yet insait long tupela yia.

Long yia 2009, i kamap tisa bilong elementeri skul. Mista Olobe i tis long Kikia-Tumberi elementeri skul long ples bilong em yet. Em i kilim 3-pela yia olgeta long kamap elementeri skul tisa.

Em i mekim gutpela wok na Hela Provinsal gavman i bin promotim em long yia 2014 long larim em i kamap supavaisa bilong ol elementeri skul insait Tagali LLG, Tari-Pori distrik.

Em i holim dispela wok na hangre bilong em long kisim save i go antap moa. Hela Provinsal Administreta William Bando i luksave long dispela na em i sponsaim Mista Olobe long kam skul gen.

Nau Mista Olobe bai go bek long Tari na wok wantaim provinsal gavman long kirapim nupela Hela Provins.

Wok painimaut i painim nupela keis TB na HIV

K1 KOKODA Inisetiv Developmen Program nau i i bin painim 51 nupela tubekulosos o sik TB keis na tupela nupela HIV keis long taim ol i wokim wanpela helt patrol, we ol i wokim ol tes bilong sik TB na HIV insait long 103 rurel ples, antap long ol maunten namel long Sentral na Noten Provins.

Ol i wokim dispela helt patrol insait long 6-pela mun wantaim ol lokal helt wokman na meri, ol Seven De Edventis Helt na Wol Visen Intanesenel.

Papua Niugini i gat bikpela mak tru long sik TB long wol. Ol ripot i kam long Wol Helt Ogenaisesen i tok, i gat 437 pipel insait long wanwan 100,000 i gat dispela sik. Na 14 pesen bilong ol dispela TB sikman na meri i gat HIV binatang tu.

Lo bilong kisim marasin bilong TB i tok, sikman na sikmeri i mas pinisim gut marasin inap long 6-pela mun na em i bikpela samting long ol i mas gat marasin long dring na tu i mas gat wasman o wasmeri long helpim ol long olgeta de i mas kisim marasin. Sapos em i no mekim gut bai dispela sik inap long kam bek gen tasol dispela taim nau bai em i no inap long pinis isi. Em bai nidim planti strongpela marasin we i kos bikpela mani na planti taim sikman o meri bai inap long dai na tu em bai kalap isi i go long ol narapela pipel. K1 Kokoda Inisetiv Program em i namba wan kain program aninit long fanding bilong Australia Eid long ol helt wokman na meri long bringim ol maikroskop na mobail jenereta wantaim ol long helt patrol, long helpim ol wokim ol

tes long painim sik TB na HIV insait long bus ples.

Ol bung patrol i bin kamapim 3200 helt konsaltesen, moa long 1500 banis marasin long ol bebi na 83 mama i gat bel i kisim sekap. Ol i givim Famili Plening toktok i go long 120 meri.

Ol helt atoriti long Sentral na Oro Provins wantaim Hiri na Sohe Distrik helt wokman na meri i bin sapotim ol long bringim dispela sevis long ol pipel.

Kokoda Inisetiv Helt Edvaisa, Annette Coppola i tok olsem bipo, 73 pesen bilong ol TB sikman na meri i save bikhet long pinisim 6-pela mun marasin saplai bilong ol na dispela i save putim ol long birua na tu ol narapela insait long komyniti long kisim wankain sik.

“Wanpela samting i save mekim ol sikman long ol i no save pinisim marasin saplai bilong ol em bikos i no gat gutpela rot long ol i kisim moa saplai. Ol i mas wokabout olsem 8-pela o 10-pela haua long kamap long helt klinik o helt senta long kisim narapela marasin saplai. Nau, 91 pesen bilong ol lain i gat sik TB i wok long kisim gut marasin bilong ol, bikos i gat ol viles helt volantia i stap long bringim marasin i go stret long haus bilong ol,” Mis Coppola i tok.

Komyniti Helt Woka Dinima Raga i wokabout wantaim ol helt tim i go insait long Maun Koiari ketsmen eria, we ol i painim 8-pela nupela keis bilong sik TB.

Em i tok moa pipel i kamaut long wokim tes taim ol i lukim na save olsem TB i save kamap long liklik binatang long bodi.

“Mipela i wok long sekim ol na putim ol long tritmen long wankain taim yet, na

mipela i gat 14 Viles Helt Volantia (VHV) husat i save sapotim ol long kisim marasin saplai bilong ol.” Mista Raga i tok.

Kokoda Inisetiv em i wanpela wok patnasip program bilong Gavman bilong Australia wantaim Gavman bilong Papua Niugini long kamapim gutpela helt, edukesen na senitesen long ol ples i stap arere long 100 kilomita Kokoda Trek.



Wanpela VHV putim nem long spetum kap



Teiya Herepe, bilong hailans tasol nau i stap long ples Ifiri long Sogeri. Em i holim spetum o spet bilong em long spetum kap long sekim sik TB.



Ol VHV Stenim ol spetum slaid ausait long gras wantaim ol emti tin na mes waia.

Westen Provins helpim YWAM Medikal Sip



Westen Provins Gavana, Ati Wobiro, na YWAM Medikal Sip Program Strateji na Patna Rilesens Menesa, Dokta Sarah Dunn.

WESTEN Provins Gavana, Ati Wobiro, i bin givim wanpela sek mani long mak bilong K200,000 i go long YWAM Medikal Sip long makim Westen Provinsal Gavman.

Wantaim dispela donesen, Gavana Wobiro i baim tok promis em i bin mekim long helpim operesenal wok ekspens bilong YWAM PNG Trening na Medikal Sip bilong Sauten Rijon na Huon-Galp, MV YWAM PNG.

Mista Wobiro i tok provinsal administresen i gat bikpela amamas long patna wantaim YWAM Medikal Sip long Westen Provins.

“Mipela i bin gat gutpela taim bilong wok bung wantaim ol YWAM Sip insait long Westen Provins inap long 5-pela yia nau wantaim pailot sip, MV

Pacific Link, na nau nupela sip, MV YWAM PNG.”

“Wok bilong ol YWAM Sip’ long ol rurel ples i mekim ol kamap wanpela bikpela patna bilong mipela long bringim sevis. Nau yet ol i lukluk long wok insait long Bamu Rurel LLLG we em i givim helpim long planti tausen pipel long stretim ol tit, stretim ol ai na trenim ol woklain bilong helt long praimerihelt ke sevis long dispela hap we helt ke i no bin gutpela stret long planti yia.”

“Pastaim long MV YWAM PNG i mekim namba wan ron bilong em, em i bin lukim YWAM tim na Midel Flai Distrik Helt Sevi patrol tim bilong mipela i wok bung wantaim long bringim ol banis marasin, matanel helt sevis na trening long olgeta ples i stap arere

long Bamu na Gama Wara. Dispela wok ol i bin mekim insait long 5-pela de tasol. Em i givim strong long ol rurel helt woka bilong mipela. Taim yumi bung wantaim yumi ken mekim moa wok.”

“Dispela nupela sip i soim pinis strong bilong en long mekim wok i go bikpela long 2015 na mipela i lukluk long moa wok kamap long namba tu hap bilong en. Dispela mani tude bai strongim wok bilong mipela long strongim helt sevis i go long ol pipel bilong Westen Provins,” Gavana Wobiro i tok.

YWAM Medikal Sip Menesing Dairekta, Ken Mulligan, i tok em i gat bikpela amamas long strongpela sapot bilong Westen Provinsal Gavman.

“Mipela amamas long wok poroman bilong mipela wantaim

Westen Provinsal Gavman. Em i gutpela long kisim dispela mani tude long pasin wanpela gutpela yia, we mipela i stat wantaim Stes 1 long stretim insait bilong MV YWAM PNG, na long em i wokim ol namba wan ron bilong em insait long PNG na nau long redi long mekim ol wok long nupela yia 2016.

“Klostu mipela i pinisim namba 2 stes bilong stretim insait bilong sip MV YWAM PNG; wantaim nupela dentis rum antap long sip na dei wok yunit na moa ples bilong ol patrol bot operesen long mama sip.

Taim olgeta wok bilong putim ol samting i pinis, mipela bai redi long helpim ol handet tausen pipel insait long Sauten Rijon na Huon Galp,” Mista Mulligan i tok.

Mis PNG i winim Mis Pasifik

MIS Papua Niugini (PNG), Abigail Havora i winim Mis Pasifik Ailan 2016.

Ol i tokaut long dispela bi-hain long fainel resis i bin kamap long Cook Ailan long dispela wiken.

Dispela em i namba wan taim insait long 6-pela yia taim PNG i joinim Mis Pasifik Ailan Pejen (MPIP) long 2010 we Mis PNG i winim taitel bilong Mis Pasifik Ailan.

Mis PNG i winim Best Sarong awat na Best Talent pefomens awat tu.

Mis Samoa em Ariana Taufao, i winim Best Intaviu awat na taitel bilong Namba wan rana-ap. Mis Tonga em, Britne Fuimaono, i winim Mis Potojenik, Mis Sosal Midia na Namba tu rana-ap.

Long wankain taim, Mis Fiji em, Zaira Begg, i kamap namba 3 na winim Best Tredisenel dres. Mis Solomon Ailan Deanne Enoch i kam namba 4. Mis Ameriken Samoa em, Suluga Talofaali, i winim spesol awat bilong Mis Pesonaliti na Mis Nesanel Turisim.

Nupela Pasifik kwin, Mis Havora, i kam bek asde na i stap long PNG nau.



Mis PNG, Abigail Havora, i win na kamap nupela Mis Pasifik Ailan 2016 long Cook Ailan.

Goodman Fielder i helpim ol mama

Esther Bralyn Wani i raitim

OL mama we man bilong ol i dai pinis, ol yangpela meri na ol pikinini long Balimo na Awaba long Westen provins i kisim helpim long Goodman Fielder.

Goodman Fielder i givim ol flawa, baket na ol ragbi bal long ol pikinini na ol mama. Olsem 108 meri na pikinini i slip long Gorobe setelmen long Badili insait long Pot Mosbi olsem 9-pela mun nau.

Tupela pasta manmeri bilong Evanjelikel Sios bilong PNG, Pasta Steven na Pasta Anna Bibaesi i kamapim dispela Open Ristoresen Misin long helpim ol meri we man bilong ol i dai na ol pikinini no gat papa bikos long papa bilong Pasta Anna husat i no bin gat papamama.

'Mipela i bin helpim ol meri na pikinini wantaim klos na givim kaikai long ol,' Pasta



Ol mama i amamas long Goodman Fielder i givim ol baket na flawa na ol i danis na singsing.

Steven i tok.

'Meri bilong mi i go bek long Balimo na kisim 98 meri long stap insait long ol nesanel program olsem 1611 King Jems Vesen Baibel, Saut Paifik Gems, 26th Ogas Nesanel Ripetens De na 40th Aniveseri long Septemba 16,' Pasta Steven i tok.

Pasta Anna i save givim

skul toktok o kaunseling long ol yangpela marit na ol yangpela pipel.

Long wankain taim, Riteil Ektivesen Tim Lida bilong Goodman Fielder, Samson Oa, i tok, 'Mipela i givim ol baket na flawa long ol kain pipel olsem na mipela i askim ol narapela ol bisnis haus tu long helpim.'

Mista Oa i tok Goodman Fielder bai go het long sapotim ol mama em man bilong ol i dai pinis na ol pikinini papa bilong ol i dai pinis.

Pasta Steven i tok bikpela tenkyu long Goodman Fielder long kain gutpela pasin bilong ol long sapotim ol olgeta mun wantaim kaikai.

Ol pasta i joinim GBV woksop

OL pasta na ol sios lida long Good Shepard Luetran Sios long Enga provins i joinim bung egensim Jenda Bes Vailens (GBV).

Ol i stap insait long wanpela wik woksop bilong GBV Man Edvokesi we Famili na Seksual Vailens Eksen Komiti (FSVAC) bilong Konsaltetiv, Implementesen na Monitoring Kaunsil (CIMC) long Maunt Hagen i holim. Jenerel Seketeri bilong

Good Shephards Luteran Sios long Papua Niugini, Ezekiel Peter i tok tenkyu long FSVAC bilong CIMC long givim kos long ol pasta na ol sios lida.

'Planti bilong ol meri ol i kisim bagarap long seksual, paitim ol na bagarapim tingting bilong ol.

Ol i lukim ol olsem ol liklik lain na mekim nogut long ol, paitim na kukim ol meri long pasin bilong sutim tok long

sanguma,' Mista Peter i tok.

Em i tok dispela em i gutpela taim na ol sios i mas bung long stopim Genda Bes Vailens.

'Wantaim ol samting mipela i lainim dispela wik, mipela i hop long go pas we ol narapela i ken bihainim na tu skulim ol pipel na insait long sios olsem GBV em i rong.

God i givim Eve long Adam long kamap poro bilong em, mipela olgeta i mas wok bung

long stopim vailens egensim ol meri,' Mista Peter i tok.

Long wankain taim, Fesiliteta bilong FSVAC, Gertrude Wap, i tok ol i holim wanpela wik woksop long skulim ol long GBV.

'Jenda bes Vailens em i wanpela sik i bagarapim ol meri long kantri na wol tu.

Em i wanpela hevi we mipela olgeta i mas sanap wantaim long egensim,' Wap i tok.



Yut, Meri na Famili

*Pastor
Barbara Lunge*

Nem bilong Jisas i gat strong

Long nem bilong Jisas olgeta man bai brukim skru na olgeta maus bai tokaut olsem Jisas Kraus em i Bikpela na ol i givim glori i go long God Papa. (Phil 2:10-11)

Mi givim pinis pawa long yu long krungutim ol snek na ol skopion na long winim olgeta strong bilong birua, na i no gat wanpela samting bai bagarapim yu. (Luk 10:10). Mi bai givim yuk i bilong kingdom bilong heven na wanem samting yu pasim long graun bai mi pasim long heven. Na wanem samting yu lusim long graun bai mi lusim long heven. (Matt 16:19).

Sapos yu mekim gutpela toktok, gutpela samting bai kamap long yu. Olsem na mi tokaut olsem bel isi, banis, gutpela tingting, na long kam insait long ol program bilong mipela ol lida na edvaisa long nem bilong Jisas! Amen!!

I gat sampela moa ol strongpela meri bilong winim birua wantaim bilip wankain olsem mi bin toktok long narapela taim long isu namba 2151. "Ol man i dai pinis i kirap bek, na mama bilong ol i kisim ol bek gen. ol birua i kalabusim sampela man na i bagarapim tru bodi bilong ol, inap long ol i dai.

Ol birua i tok, sapos ol i givim baksait long God, orait ol bai i lusim ol i go.

Tasol ol i sakim tok bilong ol birua, long wanem ol i ting sapos ol i dai ol bodi i kirap gen long matmat, na bai ol i kisim laip i gutpela moa." (Hibru 11:35).

Mi bin lukim wanpela trupela stori long vidio we em i strongim dispela kain tok long baibel. Em i stori bilong wanpela meri long Afrika husat man bilong em i dai long wanpela kar eksiden na em i bin stap long haus sik mog inap long tupela de na long namba tri de, Evanjelis Bongke i holim wanpela bikpela kruseid miting long taun bilong em olsem na meri bilong dispela man i bringim bodi bilong dai man bilong em long miting bai kirapim em gen.

Sekyuriti gat i tokim meri bilong em long lusim bodi long sios na em yet i go long miting na askim long Reinhard Bongke long pre long em long kam bek laip gen.

Na long bilip bilong em tasol, man bilong em i kam bek laip gen.

Olsem na wantaim bilip bilong em na long ol eksen bilong em na long eksen bilong em, man bilong em i kirap bek gen long dai. Mi bilip olsem Kristen yumi ken bilip long ol samting inap kamap.

Yu ken traim long mekim bilip bilong yu wok taim yu stap long graun na i no long heven tasol. **Toksave: Sapos yu i gat wari, tingting planti, ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com**

Tripela meri i makim PNG long Katolik Edukesen Wol Kongres



MI LAIK BUNGIM JISAS

Em i wanpela tru stori i bin kamap long Jakarta, kapital siti bilong Indonesia. Dispela stori i bin kamap long 25 Novemba 2015. I gat wanpela mama. Em i no bilong lotu Katolik. Em i bin ringim Pater Felix. Em i tokim Pater olsem: "Mama bilong mi i no Katolik. Nau em i sik na stap long haus sik. Dokta i tok, kidni bilong em i feil pinis. I no longpela taim bai em i dai. Pater, inap yu kam lukim mama bilong mi. Em i laikim tru long lukim yu tu. Mi pret nogut mama bilong mi indai na wish o laikim bilong em i lukim Pater i no inap kamap."

Pater i askim em, "Sapos mama bilong yu i no Katolik, olsem wanem em i save long mi? Olsem wanem yu save long namba bilong mi?"

"Mama bilong mi i bin bungim Pater, taim em i bihainim pren bilong em long atendim wanpela felosip," dispela meri i bekim.

Long mid nait stret, taim 00:00 – Pater i draivim kar i go long haus sik. Taim mama i lukim Pater, em i askim Pater olsem: "Pater, inap mi hagim yu?" Pater i tok, "Em i orait. Yu ken hagim mi."

Taim mama i hagim em, Pater i pilim ai wara bilong mama i pundaun long bodi bilong em. Mama i tok, "Pater. Mi laikim tru long bungim Jisas. Maski mi i gat planti sin na sik, mi bilip, Jisa bai kisim mi yet. Jisas tasol inap long kisim mi, maski mi i gat planti sin. Mi askim marimari bilong em, bikos mi no bin kisim em yet long laip bilong mi. Situesen long laip bilong mi tasol i pasim rot bilong mi long bungim Jisas. Maski situesen bilong mi olsem nau Pater i lukim, tasol mi bilip Jisas bai kisim mi yet."

Bihain long em i tokim Pater olsem, mama indai stap long taim em i hagim Pater yet.

Pater i pilim sori na pret wantaim. Em i tingting planti long dispela insiden. Pater i stap long haus sik inap long tingting bilong em i kamap orait na quiet.

Olgeta manmeri i stap long rum we Mama i stap na indai, i sarap na no gat wanpela i mekim toktok. Long dispela taim, Pater i stat long prea Rosari. Bihain em i putim Rosario na Piksa bilong Divain Mercy antap long han bilong mama i dai pinis long en.

Bihain Pater i wokim prea long mama idai pinis. Emi kirap nogut, bikos olgeta pikinini na bubu bilong mama i joinim em long prea.

*God stap insait long olgeta win yumi kisim.
*Jisas i save mekim ol manmeri i hangre long em i kamap pulap, em i laik bai olgeta manmeri i kam long en.
*Marimari bilong em i save kam long olgeta manmeri i painim em. (Psalm 27:4)

Sister Mary McCarthy i raitim

WANPELA bung bilong Katolik Edukesen Wol Kongres long Rom i bin lukim ol lain long olgeta hap bilong wol i bung long toktok long wok misin long Katolik edukesen.

Foapela de bung i bin stat long Novemba 18 na pinis long Novemba 21.

Sister Mary McCarthy pbvm, em Nesenel Kristen Edukesen Dairekta, Dokta Catherine Nongkas bilong DWU-Edukesen Karikulum na Lidasip na Rita Kavanamur bilong OLSH Vunapope Sekenderi skul i bin makim PNG na Solomon Ailan long dispela bung.

Oi tripela i bin stap insait long tupela bung long ol skul na ol yunivesiti.

Oi topik we ol i bin glasim



Tripela bikmeri long Katolik Edukesen long PNG, Dokta Catherine Nongkas bilong DWU, Sister Mary McCarthy Nesenel Kristen Edukesen Dairekta na Edukesen Karikulum na Lidasip na Rita Kavanamur bilong OLSH Vunapope Sekenderi skul i bin makim PNG na Solomon Ailan insait long bung long Rome.

na skelim em : Identity and Mission, People involved in Catholic Education, Formation and Challenges today and tomorrow, Sister Mary McCarthy i tok.

Em i tok i gat bikpela tingting long glasim na skelim na

strongim gen laik na wok long Katolik edukesen, na fremwok long eksen bai kamap long givim nupela strong long misin long edukesen, Sister Mary i tok. Oi tripela i bin givim ripot bilong Katolik Bisops Konprens long PNG na Solomon

Ailan we i sut long ol wok Katolik edukesen i mekim long go aut long ol sumatin i gat ol spesel nid, ol tarangu, ol lain i gat sampela hap bodi i bagarap na ol dispela i stap long hevi.

Em i tok bihainim wokim dokumen, Instrumentum Laboris, na ol askim we Rome i bin salim i kam long PNG, ol wan wan grup i wok long Katolik Edukesen Komisin i bin bung na toktok long ol samting i karamapim dispela eria.

Sister Mary i tok ol ripot we Katolik Edukesen Komisin long CBC i bin redim em ol i bin givim long dispela bung na long Kongrigesen bilong Katolik Edukesen long Rome.

Em i tok dispela i bin kamap hap bilong Lineamenta document, em situesen analisis bilong Kongres we i gat ol gutpela infomesen bilong Katolik Edukesen long wol long en.

Nupela buk long marit na famili

KAIN marit bilong tude long PNG we i no gat strongpela komitmen i wok long kamapim hevi, moa yet long ol mama na pikinini.


Wanpela nupela buk long dispela bai kamap long nupela yia, 2016 we Kristen Sios Risets ogenaimesen em Melanisen Institut (MI) i redim na kamapim.

Taitel bilong buk em "Shifting Foundations; Marriage and Family Life in Papua New Guinea."

Em i nupela long ol buk we MI i pablisim olsem POINT No 39 na em bai kamaut long neks yia.

Dispela buk i bungim wantaim ol pepa ol i bunigm wantaim long ol presentesen ol i bin mekim insait long famili laip simposium o bikpela konprens long Goroka long mun Epril long dispela yia.

MI i lukluk strong gen long famili na famili laip insait



Kava bilong nupela buk.

long PNG.

Olsem tasol planti samting long PNG olsem ikonmik, we wokim samting nating i no bihainim sampela kain stia i stap, wankain tu nau i kamap long marit na famili laip.

"Moa man na meri nau i stap wantaim tasol i no gat wok redi long marit, na tu, no gat pasin kastom we ol famili i senisim ol presen samting na pasim ol i kamap.

"Ol i no kisim tu blesing long marit long sios.

"Ol dispela infomel yunien i no gat komitmen i ken bungim hevi.

"Dispela krais bilong komitmen, dispela pasin bilong daunim strong bilong famili i lusim planti lain long PNG i no seif na i kisim bagarap, moa yet ol meri na pikinini we ol papa i lusim ol," MI i tok.

Ol raita bilong dispela buk i kam long ol kain bekraun olsem MI risets tim, ol risetsa long yunivesiti na ol tisa, ol sios lida, ol tisa long seminari, ol sosel woka na kaunsila i save wok wantaim ol lain i painim helpim long hevi bilong famili.

Long kisim moa save long dispela buk, o long baim, kontek edres em: PO Box 571 Goroka,

EHP; ringim dispela telipon namba: 532 1777 o yu ken salim email long: sales.emmai@gmail.com

Malahang Lutheran Sios hetmeri i senis

Paulus Tali i raitim

OLPELA het meri bilong Malahang Lutheran Sios insait long Lae Siti Seket, Yapah Berry, nau i lusim wok bihain long 33 yia em stap long dispela posisen.

Mama Berry i bilong Sannenksoc long Mape eria long Kote Distrik.

Mama Berry i bin statim Wokmeri Program long 1980 taim planti lain wokman na meri bilong Jemani stap long Malahang. Dispela taim em i bin yangpela

meri yet na em givim moa taim long karim wok meri ministri insait long Malahang long Ridima Peris.

Em i lusim hetmeri wok long mun Me 2015 na lukim wok ministri.

Em i no go skul long Baibel Skul tasol long harim na bihainim, kaikai long wok bilong em kamap aninit long hetmeri long Ridima Akekepe Yunamu Esekia bilong Wareo insait long Kote Distrik.

Hetmeri Mama Berry oltaim i save paitim kundu olsem belo

long bringim ol meri i kam long bung.

Kundu em i soim olsem singaut bilong Bikpela Jisas i singautim ol meri long kam bung na toktok long wok bilong ol meri insait long ministri bilong Gutnius.

Nupela hetmeri em Jenny Sogot bilong ples Boana.

Man bilong Jenny em i siaman bilong Malahang Haus lotu.

Jenny em i wanpela yangpela meri we mama Berry i helpim na givim edvais long mekim gutpela wok ministri bilong ol meri insait

long kongrigesen.

Bipo long taim bilong mama Berry, ol meri long Malahang i save kam bung gut, na kaikai bilong wok program bilong ol meri i ran gut tru.

Tasol long lukluk tude long Malahang, program bilong ol meri i no kirap gut tumas bikos long kain kain program na daunim wok ministri bilong ol meri insait long sios.

Long taim bilong olupela hetmeri i givim wok i go long nupela hetmeri, Nakaei Siloi bilong Martin

Luther Seminari Wokmeri Program i tokim ol meri long Malahang long no ken surik o tubel na lusim bilip long wokmeri program.

Em i tok liklik grup inap long kamapim bikpela samting.

Misis Siloi i tok wanbel na holim han na pre wantaim bai inap helpim yumi long kisim moa meri i go insait.

Mama Berry i tok em bai stap long Malahang long helpim Jenny long sanap strong long karim wok program bilong ol meri long seket, peris na kongrigesen.



KOMENTRI

Ol tisa i mas gat wankain luksave olsem ol arapela pablik sevan

OL tisa long NCD i kirap nogut long harim olsem bai ol i lusim 30 pesen liv fe bilong ol. Ol ripot i tok i gat wanpela liv fe komiti long NCD Edukesen sevis divisen husat i katim 30 pesen liv fe bilong ol.

Ol tisa i tok ol i bin kisim tok save long Tisa Sevis Komisin long mun Novemba olsem bai ol i rausim 30 pesen long liv pe bilong ol bikos mani i sot. Na nau ol i harim olsem liv fe komiti bai katim narapela 30 pesen gen.

Ol skul i pas las wik na planti tisa wantaim famili bilong ol i redi long go long ples na malolo long taim bilong Krismas, tasol i luk olsem bai i no gat nau. Planti bilong ol i belhat na ol i askim long wanem as na wok bilong dispela liv pe komiti. Ol i askim tu sapos ol narapela provins i gat wankain liv komiti bilong ol.

Long skel bilong pe bilong ol wokman bilong pablik sevis, mak bilong pe bilong ol tisa i stap daun-bilo tru long ol arapela wokman bilong gavman.

Ol i no kisim bikipela mani, tasol ol i mekim bikipela wok tru long skulim ol pikinini bilong yumi. Planti bilong ol dispela tisa i stap long ol ples i longwe tru long ol taun we i no gat rot bilong kar o ples balus.

Ol i stap long strong bilong ol yet. Sapos i gat hevi i kamap, bai ol i mas wokabaut planti de long kamap long gavman o misim

**Katim 30 pesen long liv fe?..
Oloman!
Dispela ol komiti bilong Liv fe i ting mipela i wok long banis kau?!!**



Jada 0151

stesis long salim tok long provin-sal hetkwata. Planti taim ol yet bai painim rot long go kamap long taun na stretim wanem hevi i kamap long skul.

Dispela kain laip bilong ol i hatwok tru na planti yangpela manmeri husat i greduet nau tasol long ol tisa kolses i no laik go wok long ol kain ples longwe olsem. Ol i laik

hevi bilong liv pe na tiket bilong balus na ol alawens bilong ol tisa i save mekim ol i givap long givim kwaliti wok long skulim ol pikinini.

stap klostu long taun we laip i isi liklik.

Olsem na planti ol skul longwe i gat ol tisa wantaim ol famili bilong ol i save wok long skulim ol pikinini. Oltaim ol i save mekim bikipela hatwok tru tasol i no gat gutpela luksave long dispela hatwok bilong ol.

Olgeta yia long taim bilong Krismas, bai yumi harim komplem bilong ol tisa long liv pe o liv tiket bilong ol.

Las yia, i bin strongpela komplem i kamap long ol tisa long kantri bikos ol i no kisim tiket bilong ol.

Dispela komplem bilong ol i mekim na gavman i bin promis long senisim pasin bilong givimaut liv tiket.

Sampela provins i kisim mani na givim i go stret long ol tisa long baim tiket blong ol yet.

Ol i no laik yusim ol travel ejensi bikos long ol hevi i bin kamap long tiket bilong ol tisa.

Ol dispela kain hevi bilong liv pe na tiket bilong balus na ol alawens bilong ol tisa i save mekim ol i givap long givim kwaliti wok long skulim ol pikinini.

Planti bilong ol i save lusim bikipela taim tru long go i kam long het opis bilong Edukesen Dipatmen long provins o rijon long sekap long ol dispela samting.

Long taim ol i sanap long lain long sekap long ol dispela samting, bai taim bilong ol long malolo i sot tu na ol i no inap long painim spes long balus bikos Desemba em i bisi taim tru long ol balus i karim ol pasindia i go holide long ples.

Husat ol lain i lukautim pe bilong ol tisa, o liv pe bilong ol o ol alawens bilong ol i mas mekim stret wok.

Ol tisa i gat wankain rait na kondisen bilong wok olsem ol arapela pablik sevan bilong PNG. Mobe-ta yumi mas luksave long dispela na stretim gut pe bilong ol wantaim ol alawens bilong ol.

I gat planti tausien tisa long kantri na ol i gat bikipela yunion tru long ol wokman bilong gavman.

Tisa Sevis Komisin na Nesenel Dipatmen bilong Edukesen wantaim ol provinsal edukesen opis i mas wok bung long stretim dispela hevi bilong ol tisa nau na stopim ol komplem.

Planti ol tisa i givim bikipela hap bilong laip bilong ol long skulim ol pikinini bilong PNG, orait ol lida i mas soim rispek na givim wankain luksave i go long ol olsem ol arapela pablik sevan long Waigani i save kisim.

Yumi askim long mining bilong pati na amamas bilong Krismas



Laip i hat tru long ol. Yumi i ken ritim long Luk 2: 1-20.

Maria na Josep i mas wokabaut long longpela hap long rejista nem bilong tupela.

Tupela i mas wokabaut long Nazaret na go long Bethlehem, em i luk olsem tupela de wokabaut.

Na moa yet, long dispela taim Mama Maria i gat bel.

Mama i gat bel i hat long wokabaut tasol askim long Sisa Agustus i kamap long ol i mas go long asples bilong ol

em Josep husat i lain bilong Juda i mas go long Betlehem na rejista nem bilong tupela.

Ating wantaim long dispela hevi i mas gat hevi bilong no gat wara bikos em ples i drai na no gat inap kaikai.

Na taim Maria na Josep i kamap long Betlehem, taim i kamap klostu long Maria i karim.

Tupela i no gat haus bilong stap na olsem ol i mas painim haus bilong stap na malolo bai Maria i ken karim. Tasol dispela tu i no gat.

Maria i mas karim long ples we ol i lukautim ol sipsip na bulmakau.

Dispela i no gat gutpela ples long nupela bebi i kamap long em tasol no gat moa ples na Maria i mas karim tasol.

Taim yumi tingim olgeta dispela ol stori yumi ken skelim olsem namba wan Krismas i no taim bilong amamas na givim presen olsem yumi mekim long dispela taim. Nogat.

Em i taim bilong hatwok na pen.

Ating taim yumi i malolo, bung wantaim famili, ol wantok na poroman na selebret long tingim de mama karim Jisas, em i gutpela tu yumi mas tingim taim Maria na Josep i wokabaut long longpela rot, no gat ples bilong slip na Jisas i kamap long haus kaikai bilong ol sipsip na ol bulmakau.

Em i soim tu olsem yumi mas tingim ol tarangu manmeri na pikinini tu.

Krismas i taim bilong tingim ol manmeri husat i no gat samting.

Ol lain husat i stap long haus sik, haus kalabus, ol tarangu i no gat haus, no gat mani, kaikai, klos, ol lapun, husat man o meri bilong ol i dai pinis o ol pikinini papamama bilong ol i dai pinis.

Yumi mas tingim ol na go lukim ol, givim samting long ol na amamas wantaim ol tu.



Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Kainkain mango mekim mama amamas...

Tupela tumbuna bilong em Solomon Terence (lephan) na Parkop Kamau holim mango prut bilong Irian Jaya em groim.



James G. Kila I raitim

OL prut diwai bilong Madang i karim planti kaikai tru nau bikos em i Krismas taim.

Long planti ples long taun na rurel ples ol prut diwai olsem mango i karim planti tru na kamap nais tru na save mekim ples luk nais na bilas stret. Planti taim ol dispela prut i save mau na mekim sampela manmeri i aigris stret.

Mama Hilda Shong bilong ples Boroman long Karkar Ailan i save amamas long lukim tupela liklik tumbuna man bilong em Parkop Kamau na Solomon Terence long moning taim i save ron i go i kam long kisim ol mau mango i pundaun arere long haus.

Mama Hilda i save stap long Finsch Rot long Nu Taun wantaim man bilong em Manaseh, o 'Bai Krongki' olsem planti lain wantaim ol pikinini na tumbuna bilong em i save kolim em. Hilda em i wanpela komyniti helt woka long Kons Klinik long Modilon Jeneral Hausik.

Mama Hilda i save planim kainkain mango diwai na ol prut na tu kainkain naispela plawa insait long banis bilong em. Em i save givim moa taim long lukautim ol plawa bilong em olgeta taim

"Dispela mango diwai sanap ya, em bilong Irian Jaya, na mi kisim sit long ol pren i stap klostu na mi stretim gut na planim," Hilda i tok.

"Narapela mango long hap em 'apel mango' " Hilda i tok.

Hilda i save mekim gutpela pasin long taim bilong prut sisen. Long Olgeta prut sisen taim mango i karim kaikai na mau, em i save serim ol prut wantaim ol lain klostu na tu em i save bringim long wok-ples bilong em na serim wantaim ol wanwok na ol dokta husat i wok long Kons Klinik.

Hilda i save groim planti ol arapela prut tu olsem okari, lau-lau, Pau, suga kein na ol arapela plawa long haus banis bilong famili bilong em long Finsch Rot.

Em i save givim moa taim bilong em long lukautim ol plawa na tu ol prut diwai i sanap insait long eria bilong haus long mekim eria i luk nais na tu bringim naispela swit smel na tu bringim ol pisin, bataflai na ol arapela binatang i go long eria.

"Taim Papa God i wokim kamap Gaden ov Iden o Paradise em i wokim gaden ya nais tru na larim Adam na Iv wantaim ol diwai, gras na ol arapela samting i stap amamas wantaim ol enimal.

"Olsem na tude, yumi ol

manmeri long graun i mas lukautim gut ol plawa na diwai na ol binating na enimal long gaden we yumi stap, long mekim ples i luk nais na gutpela," Hilda i tok.

Dispela mama bilong Karkar Ailan o KRX i tok nau em klostu taim bilong Krismas na planti ol diwai i karim naispela prut long diwai na tu ol kaikai long gaden olsem melen, lukamba na ol sayor tu i kamap planti tru. Dispela em naispela blesing Papa God i givim.

Em i tok tu olsem nau em Krismas taim na yumi olgeta Kristen manmeri i mas tingim taim Mama Maria i karim Jisas Kraus, husat i kamdaun long sevim yumi ol manmeri bilong sin.

"Long dispela taim yumi mas tingim long senisim pasin na daunim yumi yet long stap gut na bihainim Tok bilong Papa God," Hilda i tok.

Em i tok em i save amamas long kaunim John 3 long Buk Baibel we Jisas i toktok long Hai Pris Nikodemus long kamap nupela ken long bilip.

Hilda i tok tu olsem Krismas em i taim bilong stap bung wantaim famili na serim taim na kaikai na tok tenkyu long God olsem em i givim laip long yumi. Wankain olsem laip em i givim long ol plawa na ol prut.



Hilda wantaim ol tumbuna bilong em long plawa gaden long Finsch Rot long Madang.

Hilda Shong wantaim mango prut bilong Irian Jaya em groim.

Ol poto James G. Kila



Kala Karo em i kamap namba wan long ekstenel eksam wantaim 132 poin na kisim mak bilong daks long Alan Jones Memoriel Praimeri Skul long yia 2015



Namba 20 gret 8 greduesen

**Stori na foto
Frieda Sila Kana**

ALAN Jones Memoriel Praimeri Skul (AJM) long bikples Hula, Rigo Distrik long Sentral Provins, i gat planti nem long bipo i kam na las pastaim long dispela nem, em ol i bin kolim long Manea, Manea.

Dispela skul em i gat moa long 50 krismas na em i bin senisim nem planti taim insait long ol dispela yia em i bin stap, stat yet long taim bilong koloniel gavman i kam. Tasol nau long dispela taim long de namba 10 Desemba, 2015 dispela level 6 praimer skul i kisim nupela nem gen na tu em i go long narapela level bilong edukesen sistem.

Ripot bilong Mista Karaho i tok, Alan Jones Memoriel em i wanpela bilong ol 4-pela level 6 praimer skul long Sentral Provins na em i gat 607 sumatin long stat bilong yia tasol planti i bin go aut na ol i lukim skul yia i pinis wantaim 506 tasol. Em i bin stat wantaim 20 tisa tasol nau skul i pinis wantaim 17 tisa tasol.

Mista Karaho i tok moa olsem akademik standet bilong Alan Jones em i orait tasol. Em i tok, long las yia Alan Jones Memoriel i bin kamap namba wan long ol Sentral Provins praimer skul eksem wantaim 131 poin.

Long 2011 namba wan mak ol i bin kisim long gret 8 eksem em i bin 132 na gen long dispela yia daks bilong ol i kisim 132 poin bilong 150 total poin. Wantaim dispela kain mak, Hetmasta Karaho i tok, skul inap long kalap i go long narapela level antap isi tasol. Dispela yia Alan Jones i bin gat 84 gret 8 sumatin i greduet.

Wantaim graduation bilong 84 gret 8 sumatain, skul i amamas long lukim tupela nupela dabol klasrum wantaim wanpela laibreri na tupela haus tisa.

Asisten Seketeri bilong Edukesen, Dokta Apelis Eliakam i bin tokaut olsem dispela skul i kisim nupela nem, olsem 'Hud Poin De Haiskul' long taim bilong namba 58 spis de na namba 20 greduesen de bilong ol gret 8 na long opim tripela nupela klasrum wantaim wanpela laibreri na tupela haus tisa.

Nupela Hud Poin De Haiskul bai stat long neks yia wantaim 154 sumatin na 57 bilong ol nupela gret em bilong Alan Jones Praimer Skul yet. Hetmasta bilong Alan Jones Praimeri Skul, Henry Karaho i tok ol narapela sumatin bilong gret 9 bai kam long ol narapela skul insait long eria bilong Hud Poin yet.

Gavana bilong Sentral Provins, Kila Haoda husat i bin donetim

K100,000 bilong helpim skul long las yia i bin amamas long stap long dispela taim na opim ol nupela klasrum wantaim tupela haus tisa na tu long opim nupela de haiskul bilong Hud Poin.

Sentral Provinsal Edministresen aninit long Edukesen Divisen i putim K85,000 na AusAID i bin bungim mani long kirapim tupela klasrum na tupela haus tisa. AusAID i bin laikim wanpela ablusen blok bilong ol pikinini meri wantaim wanpela dabol klasrum tasol skul i bin senisim na wokim wanpela laibreri.

Rijonal Projek Opisa bilong Helt na Edukesen Prokumen Fasiliti bilong AusAID, Marie Rose Vaki i bin makim AusAID long dispela taim na em i tok olsem dispela mani we i kam long stretim ol klasrum em i kam aninit long wok patnasip bilong Gavman bilong Australia wantaim Gavman bilong PNG. Aninit long dispela program, 20 skul long Sentral Provins bai kisim helpim, na Alan Jones Memoriel em i namba wan long ol.

Plantu pipel tru i bin kamap long amamas wantaim ol pikinini bilong ol long dispela de na lukim Gavana i opim ol nupela klasrum na haus tisa na tokaut long nupela Hai skul i kamap.

Alan Jones Memoriel

Hula dabol selebresen



Grup foto long fran bilong notis bot bilong nupela Hud Poin De Haiskul – Lephani i go long raithan – Hetmasta Henry Karaho, Hula Wod Kaunsila, Salote Ravu, Sentral Provins Gavana, Kila Haoda, AusAID Rijonal Opisa bilong Helt na Edukesen, Marie Rose Vaki na Eksen Siaman bilong Alan Jones Memoriel Skul Bod ov Menesmen, Kevin Rupa.



Tupela nupela dabol klasrum

BSP amamasim ol nius manmeri



Ol bikpela pes bilong ol nius manmeri na ol bikpela pes bilong BSP.

Nicky Bernard i raitim

BENK Saut Pasifik(BSP) i kisim wanpela apinun long las wik long amamasim ol nius manmeri husat save i raitim na tokaut long stori bilong ol long niuspepa, redio na TV long tok tenkyu long ol long dispela yia.

BSP i save mekim dispela bung bilong ol nius manmeri olgeta yia, ol ripota na poto man, kamera man husat ol save go long wok bilong dispela yia, ol save askim ol long kam bung na BSP save tok tenkyu long ol.

Long las wik Fonde BSP maketing dipatmen i mekim dispela pati bilong ol nius manmeri i bikpela tru long wanem ol nius manmeri bin mekim bikpela long Pasifik Gem. BSP em bikpela spona bilong dispela Pasifik Gem olsem na ol nius manmeri i mekim bikpela wok long raitim na tokaut long nius bilong olgeta pilai i kamap long 2015 Pasifik Gem.

Planti ol liklik pilai BSP i kamapim long dispela nait bilong ol nius manmeri long pilai na winim prais na dispela i mekim ol nius manmeri

i amamas tru.

Marketing Manesa bilong BSP i tokim ol nius manmeri long lukautim ol gut long dispela Krismas na Niu Yia na em amamas long wok bung wantaim ol long 2016.

Meri go pas long makim maus bilong ol midia manmeri i tok tenkyu long BSP long wok ol nius manmeri save mekim long helpim kampaini bilong ol na ol manmeri long ol rural ples insait long kantri.

Moa long 30 nius manmeri i bin go long dispela bung na amamasim ol wantaim Marketing Dipatment bilong BSP.

Stori bilong tumbuna

Rot we Saa Kbleku wanpisin i kamap

BIPO, bipo tru, tumbuna bilong Saa Kbleku traib long Gumini Distrik, Simbu Provins, i kam aut long Kup. Tupela poroman em Kumai na Kungom i stap. Tupela i stap wantaim, skelim kaikai, helpim narapela na ol i stap gut.

Wanpela taim, Kungo i kilim walabi na i no givim long Kumai. Olsem na Kumai i wari na tokim ol lain bilong em long rausim Kungom.

Ol i kam raunim Kungom na em i ranawe i go long bus. Sampel i sore long Kungom na go wantaim. Sampela i brukim wara Maril na go long Mui Kone. Sampela i bihainim rot go long Kelau. Em ol Saa Kubleku husat i stap long Sait bilong Nomane.

Are Babia wantaim ol meri pikinini bilong em i stap yet long Mui Kone.

Wanpela taim, tupela lapun manmeri i wokabout i go na ol pikinini bilong Arre Babia i lap long baksait.

Tupela lapun i sem na ol i go longwe. Lapun man i tokim lapun meri, purpur bilong yu em orait, lukim as tanget bilong mi. Lapun meri i tok yu tu em i orait.

Tupela i go bek long haus na tokim ol pikinini bilong ol long rausim Arre Babia famili.

Moning taim ol papa graun i kam raunim ol Arre Babia famili. Arre Babia famili i ranawe i go long maunten na go long bikpela bus namel long Karamui na Gumnine. Ol i go stap long Bomai kantri sait.

Wanpela taim, Arre Babia i painim wel abus i go long hapsait bilong wara.

Em i raunim wanpela walabi na walabi i ran i go na kam bek long sem hap, na em i kilim.

Bihain em i lukim olsem dispela hap em i gutpela ples. Narapela de, em i kam na wokim gaden long ples ol i kolim olong Mui Kone.

Em i kamapim bikpela populesen. Namba wan pikinini em Sai Kuikane, namba tu em Sa Tobeku, namba tri em Saa Baimin Gaulin na namba foa em Arre Baa.

Nau yet, namba bilong ol pipel i gro na kamap planti tru. Foapela wod kaunsel nau i stap long Saa Kaleku (S-K) traib na mipela nau i stap olsem 6-pela o 7-pela jeneresen.

Samuel Gore
Simbu



Boss meri bilong BSP Mary i wok long gesim nem bilong husat i stap long hat bilong em. PR Menesa Barnabas Pondros i wok long askim em. Ol poto Nicky Bernard.

NCDC amamasim ol wok manmeri bilong em

NESENEL Kapital Distrik Komisni i amamasim ol wok manmeri bilong em wantaim ol soping vausa long amamasim ol famili bilong long dispela Krismas na Nu Yia.

Long las wik Siti Menesa,

Leslie Alu, i givim sampel vausa i go long ol wok manmeri bilong em long gutpela wok na tu bikpela wok ol mekim long lukautim siti long taim bilong bikpela Pasifik Gem i kamap long Pot Mosbi.

NCDC i gat 733 wok manmeri husat i save aninit long Komisni na dispela olgeta manmeri bai kisim dispela soping vausa.

Ol lain husat i go pat taim wok long NCDC tu bai kisim

dispela gutpela presen i kam long Siti Menesa na NCDC.

Dispela olgeta soping vausa i kamapim mani mak long K174,000 NCDC bai stretim long ol stua husat i givim dispela ol vausa.



Siti Menesa Leslie Alu i givim ol soping vausa long ol wok manmeri bilong em. Poto: NCDC

TOKSAVE:
WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C-Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500.
Tenkyu

Em nau! Ol pikinini i ken painim rot i go long ples wantaim Wantok kru...



Kange bilong Erave

WANPELA taim Kanage i stap long Erave na em i wokabaut i go long Kagua. Tarangu i no gat mani long baim PMV.Olsem na em i kilim skin long wokabaut long lek.

Tuhat na san i kukim em, tasol em i go yet. Namel long rot em i lukim tupela pisin i stap long diwai. Kanage kwik taim tasol i kisim katapel na em i sutim tupela pisin. Long wanpela ston tasol, em i sutim tupela pisin i go daun. Em i kisim tupela pisin na em i stat long wokabaut na wanpela kar i kam. Kwik taim tasol, Kanage i stopim kar ya na kar i stop.

Draiva i kirap na askim Kanage, Why did you stop the car? Don't say, why did, me laikim kar. For what reason? Hire buses, yu laik to see me gat tupela pisin i hat long karim. Draiva i kirap na askim Kanage. How much for hire? Kanage i kirap na tokim draiva ya, ha-iarim long wan siling tu siling?

Kanage i putim tupela pisin long baksait long kar na ol tek op i go. Taim kar i ran i go yet, 4-pela taia bilong kar i pans. Kwik taim tru dariva kam ausait long kar na askim Kanage; hey! Yu karim sampela malala o skin diwai na mekim o? Kanage i kirap na tokim draiva ya, luk, hevi bilong tupela pisin ya i mekim. Em i winim hevi bilong tupela kau, na matala bisnis. Yu blem the two pisin. Yu dispela a draiva i ekting stret na yu putim gia bilong yu long 60 i go ap 20 rives ya na 4-pela taia bilong yu i pans i go daun. Kanage i kirap na tokim draiva ya, draiva olsem em riai ah?

Yu kisim taim tu, mi tu kisim taim tu na equals Bam Bam---- Draiva i belhat na em i rausim Kanage i go daun long kain toktok bilong en.

Martin Ipitango Galu Erave, S.H.P

Tingim tumbuna

De bilong tingim ol soldia long wo. i no tulait gut yet na Kanage i stat long krai. Em i tingim ol tumbuna bilong em ol Siapan (Japan) i kilim ol.

Taim meri bilong em i harim Kanage i krai, em i askim Kanage, lewa long wanem samting stret na em i wok long krai.



Emi askim em olsem, "Yu hangere o yu tingim ol yangpela taim bilong yumi bung long as bilong mango na pasim tok long marit? "

Dispela i mekim Kanage i singaut nogut tru na krai, "O papa bilong mi. husat i kilim yu ol Siapan o yumi Niugini Papua yet. Netpi kaikai Netpi na kanaka kaikai kanaka"


Taim meri i harim olsem em i lap i dai nogut tru na apsait bel bilong em i pen.

Jamex Angoram, Is Sipik.


Ansa bilong Wod Pilai isu 2152



EM ORAIT




EM NOGUT



Ol wod lista hia:

- ARESTIM
ASDE
ARERE
BUNARA
BRUK
BOMBOM
DISAIPEL
DRAIVIM
DONA
FAIL
FAIV
GUTPELA
GOHET
HOLAN
HAPIM
ISIPASIN
KASKAS
KIBUNG
KUKAMBA
KRUSEFIKS
LAIKIM
LOMAN
MARASIN
NIUSPEPA
OLSEM

NOVAJAMPWJGUTPELASLG
OEFMEIZSJEKRUSEFIKSE
HETABDTNXCNEOPEIRZVR
OQZDUEMELAIKIMINNEWW
BRUKNAREREREUAMSOFAR
QORHATIGASSISZSSHRWA
SOPKRSNOSIPBNNWSPXOF
LDHUAISHDEEMILEIAJFA
OORKSOXEERPSSGYEEIIGG
DNSARESTIMADVIOPNRMH
FARMIHLLBAPXIKHSRBMZN
KAEBLVZEISMFTENGHRRH
MIIAHKISCUMLIRZSAFME
ETEVAHIMRESHRUFGSEYH
VEDBPVOBSSZLAONUROFTS
CHWJIBSLUIHWISRASAT
ETTSMSOBANIOATYGLOCF
BPLOMANFBNGAATGUHIES
BIBVODCLCQSDSEYDVSP
ECDOMREEMPEINPLREPML



Saudi Arabia i wokim histori long votim 17-pela meri

Wanpela meri Saudi Arabia i putim vot pepa bilong em i go insait long balot bokis long poling stesen. Stori na piksa i kam long - abc.net.au



SAUDI Arabia em liklik kantri long Midel Is i wokim histori long votim 17-pela meri na tu, ol meri i vot long namba wan taim.

Ol Saudi Arabia i votim 17-pela meri long holim pablik opis long lokol kaunsel ileksen insait long dispela Islamik Kingdom. Dispela em i namba wan taim kingdom ya i larim ol meri long go insait long ileksen, ol media ripot long kantri i tok.

Dispela em i namba wan taim tu we ol meri i vot na tu, ran olsem ol kendidet. Dispela em i bikpela senis long kamap bikos dispela kantri i tambuim ol meri long draivim kar na tu, olgeta bikpela disisen long laip em ol hauslain man i save mekim, ol meri i no gat.

Ol ripot i tok Interia Ministri bilong Saudi Arabia i tok ol i makim 17-pela meri bilong olgeta hap long kantri i go insait na ol i win long ileksen.

Sahar Hassan em wimen rait ektivis i tok em i amamas

tru long planti meri i win, bikos ol i no bin ting olsem dispela kain gutpela kaikai bai kamap.

Sampela ol meri husat i win i tok ol bai karim maus bilong ol meri long ol samting ol i laikim long en i go long kaunsel.

King Abdullah bilong Saudi Arabia husat i bin dai long mun Janueri long dispela yia i bin statim dispela wok long sapotim ol meri long go insait long ol wok long pablik na sosaiti taim long 2011, em i tokaut olsem ol meri bai vot long 2015. Na tu, dispela sapot bilong King Abdullah i lukim moa meri long Saudi Arabia i wok long go insait

long yunivesiti na kisim moa meri long wok.

Planti senis nau i kamap long wol long sait bilong ol meri na jenda ikwaliti, tasol long Saudi Arabia, senis i stat isi isi tasol bikos demokrasi i no stap klia na tu, no gat sosel senis tumas.

Long wankain taim, bipo King Abdullah i bin wokim toktok long sapotim ol meri, senia man long sait bilong lotu long Saudi Arabia em Gren Mufti i bin tok ol meri i go insait long politik i olsem opim dua long devil.

Moa long 900 meri i bin stap insait long 6,440 kendidet i resis long 284 lokol kainsel sia.

Colombia: Ol Farc paitman i holim pasim abosen nes



Piksa 5-Ol ripot i soim bikpela mak bilong ol Farc paita em ol meri. Stori na poto i kam long bbc.com

OL polis long Spain i holim pasim wanpela man husat ol i sutim tok long rausim moa long 100 bebi long bel bilong ol meri paitman bilong bikpela pait grup, Farc long kantri Colombia, Saut Amerika.

Hector Arboleda Albeidis Buitrago i bin wok olsem nes long Madrid, ol atoriti i tok.

Colombia i laikim bai Spain i larim ol i kisim em i go long kantri na em i ken

sanap long kot.

Colombia i tok em i mekim wok painim long 150 keis bilong ol pastaim paita husat i tok ol i bin fosim na rausim bebi long bel bilong ol, na Mista Albeidis Buitrago husat ol i save long em olsem Nes" i kisim ol tok sut long wokim abosen o rausim ol bebi bilong ol dispela meri paita.

Ol Farc paitman i pait long 50 krismas nau tasol ol pis

toktok long Cuba i bin stat long 2012 i wok long kamapim ol gutpela wok go het.

Ol i bin kamapim Farc pait grup long 1964 long sanapim Maxist gavman, tasol long sampela yia nau, hevi i kamap bikos ol i go insait long drag tred.

Moa long 220,000 pipel i dai pinis long dispela pait na planti bilong ol em ol man meri nating.

Paris klaimet dil: Historik klaimet senis agrimen kamap long COP21 bung



COP21 Kalimet Konprens. Stori na poto i kam long abc.net.au

GLOBAL klaimet senis konprens long Paris, Frans i kamapim wanpela intanesenel agrimen bai senisim wol we nau i save yusim fosil fiul long kamapim ol wok ikonomi na developmen, na daunim mak bilong global woming (o wol i go tuhat) i go daun aninit long 2 digris Celsius.

Foren Minista bilong Frans, Laurent Fabius, i bin pinisim klostu tupela wik bilong bung wantaim pairap bilong gavel o hap ain we i makim wanbel bilong ol minista husat i bin sanap long sampela minit na paitim han na amamas na singaut.

"Mi lukim rum, mi lukim olgeta i wanbel na no gat i egensim. Olgeta i wanbel long Paris klaimet agrimen, "Mista Fabius i tok na i skruim toktok i go moa olsem "hap ain i ken liklik, tasol em inap mekim ol bikpela samting."

Nupela triti bai stat long yia 2020.

Mista Fabius i tok dispela agrimen bai daunim mak bilong global woming, samting i wok long kamapim hevi long ol pipel long wol we solwara i wok long go antap na karim ol ples, kamapim taim bilong bikpela san, bikpela

ren na taitwara, ol bikpela na strongpela win, i go daun long mak aninit long 2 digris Celsius o 1.5 tu.

Presiden Barack Obama bilong Amerika i wanpela long ol wol lida husat i amamas long dispela agrimen na i tok dispela i makim nupela senis long wol long sait bilong klaimet senis.

"Dispela agrimen i makim bes sans yumi i gat long sevim dispela wanpela planet tasol yumi stap long en. Yumi bin kam wantaim na kamap wantaim strongpela agrimen we wol i laikim na yumi inpairim," Mista Obama i tok.

Foren Minista bilong Australia, Julie Bishop, i makim Ambrela Kantri Grup, em koalisen bilong ol develop kantri ausait long Yurop na tok wok bilong yumi i pinis na nau yumi go bek long ol wan wan kantri bilong yumi na go hetim dispela agrimen i gat histori long en.

Long laspela toktok bilong en, Mista Fabius i askim strong ol kantri long sainim triti o agrimen na i tok, "sapos yumi bin feil tude, bai yumi bildim dispela hop olsemn wanem? Bai yusim

lusim tras na antap long en, malti nesenelism na intanesenel komyuniti bai inapim salens i samting yumi gat long en," Mista Fabius i tromoim dispela toktok long ol.

Planti i amamas long dispela Paris Klaimet Senis 2015 agrimen na tok dispela i sanapim gol long daunim mak bilong nogut grinhaus ges we man i kamapim long dispela senseri taim em i kamapim sistem we ol kantri yet i putim ol we o rot long daunim ol grinhaus ges na tu, givim bilien moa man long helpim ol liklik o tarangu kantri long bihainim rot long kamap moa grin ikonomi.

Ol saientis i bin givim tok lukaut pinis olsem planti ges no gut tumas long etmosfia, moa yet long kol, oil na ges, bai mekim graun i kisim moa tuhat bilong san.

Olsem na ol samting i wok long soim olsem dispela yia i kamap hotpela yia long rekot winim dispela bilong las yia.

Ausait long ples na strit long Paris we ol wol lida i bung, planti tausen pipel i putim retpela klos i bin wokim demonstresen long soim retpela lain we ol i no laikim wol long abrusim.

Oil prais i bagarap

luk olsem ol samting i wok long go no gut long ol oil produsa. Namba wan sain o mak em diman long oil i wok long go daun o i no bikpela, tasol i gat ova saplai long oil tu.

Ol oil prais long ki US na Yurop maket i pundaun i go daun stret insait long 7-pela yia, long mak bilong US40 long wanpela barel, Intenasenel Eneji Ejensi (IEA) i tok ol namba wan sain long

pundaun long diman i wok long kamap nau.

Ol wok glasim i soim olsem Brent Crude na West Texas Intamidiet prais i pundaun i go daun long 5 pesen.

Tu komoditi i pundaun long moa long 10 pesen mak taim yuniti namel long ol OPEC memba i bagarap na i gat pret olsem ol oil produsa long galp bai go het long apim prodaksen, maski

prais i pundaun o i gutpela.

Ol ripot i tok OPEC i wok long bamim moa oil bihain long Dsaudi Arabia i bin tokim ol katel memba wanpela yia i go pinis olsem no ken katim daun saplai na sapotim maket sea egensim gro prodaksen long US na Rasia oil fil.

Dispela i ken mekim ol lainkantri i no memba bilong OPEC i pundaun long oil binis.

Pait sip bilong Rasia i paialong wanpela pising sip bilong Turkey



Sip bilong Rasia em, Smetlivy, i bin anka klostu long Lemnos Ailan long Gris taim birua i kamap. Stori na poto i kam long bbc.com

Turkey na Rasia i skruim yet kros namel long ol we i bin stat taim Turkey i bin sutim wanpela pait balus bilong Rasia.

Long nau, Rasia i tok wanpela pait sip bilong em i bin paia i go long pising bot bilong Turkey long Aegean Si long abrusim tupela sip i bam. Toktok i kam long Difens

Ministri bilong Rasia i tok sip bilong Turkey i bin go klostu long mak bilong 1,800 fit bipo em i tanim i go bihain long Rasia sip i paia long en.

Kepten bilong sip bilong Turkey i tok em i no bin save olsem ol i sut long sip bilong em.

Long Rasia, ol i samonim militeri atase bilong Turkey

long dispela samting.

Nau hevi stap namel gen long tupela kantri. Foren Minista bilong Turkey, Mevlut Cavusoglu, i salim tok lukaut olsem Ankara i no amamas long Rasia long dispela samting na i tok Rasia i wok long yusim olgeta rot long kik bek long em long daunim pait balus bilong em.



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

Ol Vanuatu Sios i wari long politikel korapsen



Planti pipel ausaitlong Kot haus taim ol i sasim ol Palamen memba long Korapsen. Pastor Allan Nafuki bilong Presbyterian Sios long Vanuatu i toktok. *Poto: ABC*

Caroline Tiriman i raitim

SEKETERI bilong Presbyterian sios long Vanuatu i tok ol lain lotu i wari long korapsen em i go het long ol wok politik long kantri.

Pastor Allan Nafuki i mekim dispela toktok bihainim ol wok politik we Suprim Kot t i bin kalabusim 14-pela Palamen memba long gavman sait bilong Palamen long ol sas bilong gris mani o braiberi na korapsen.

Long las wik Mande, Suprim

Kot i bin tokaut tu olsem ol dispela ol Palamen memba wantaim tu Minista bifp bilong Fainens, Willy Jimmy, bai no nap go insait long wok politik inap long 10-pela yia.

Suprim Kot i bin harim kot keis egensim tingting bilong President Baldwin Lonsdale long pinisim o disolvim Palamen.

President Lonsdale i bin tokaut tu olsem ol pipel bai holim kwik wanpela ileksen long Janueri 22, 2016 o neks yia.

Solomon Ailan i mas mekim moa humen rait awenes



Ol pikinini olsem i gat rait long skul. *Poto: ABC*

Caroline Tiriman i raitim

PLANTI taim yumi save tok-tok long ol humen rait bilong ol pipel long Pasifik rijon, tasol planti pipel i no save gut long wanem samting tru i karamapim humen rait bilong ol.

Dispela askim i kamapen taim ol kantri long wol i makim International Human Rights Day. Las wik Fraide tu em i bin

laspela de long 16 Days of Activism em Yunaitet Nesens i bin kamapim bilong mekim awenes na tok skul bilong stopim jenda beis vailens.

Long Solomon Ailan, ol pipel i bin holim wanpela bung tlong Fraide nait long Honiara we bai oli laitim ol kendel na tu, ol i holim wanpela konset long pinisim displea 16 de bilong ek-tivisim.

Wol Indijinis pipel na klaimet senis

Caroline Tiriman i raitim

OL Indiginis pipel i laikim ol wol lida i luksave long ol bikpela askim na waril bilong ol long klaimet senis.

Bikpela miting bilong klaimet senis long Paris, biktaun bilong Frans we planti indijinis lain bilong Wol olsem long Not na Saut Amerika, Canada, Asia na tu ol pipel bilong Pasifik, i traim long putim ol tingting na wari bilong ol i go long ol lida bilong wol long luksave long ol dispela wari bilong ol.

Ol dispela pipel i tok olsem

ol i namba wan pipel long bungim hevei long klaimet senis long wanem, planti ol bikbus na enviromen bilong ol i bagarap bihainim ol bikpela wok developmen.

Long Pasifik rijon ol indijinis pipel i tok klaimet senis i wok long bagarapim ol ailan bilong ol long wanem, solwara i wok long go antap.

Tasol ol i tok ol i gat save long lukautim ol yet bihainim save bilong ol tumbuna na ol i laikim ol bikpela kantri long luksave long dispela.

Kenn Mondia, em i man i



Sampela long ol dispela Klaimet Waria i bin stap long bikpela bung long Paris, Frans. *Poto: ABC*

go pas long patna with Melanesians i stap long Paris bung i tok em i laik lukim ol

lida bilong Wol i luksave long ol displea wari na askim bilong ol.

Australia i save givim strongpela mekim save long ol PNG pipel

John Papik i raitim

AUSTRALIA i no save mekim gut ol pipel bilong PNG taim ol i stap long ol kain kain trabel long Australia, winim pasin we PNG i save mekim long ol pipel bi-

long Australia husat i save kamapim trabel insat long PNG.

Ronnie Knight memba bilong Manus Open long PNG Nesenel Palamen i bin mekim dispela toktok bihainim long sampela pipel bliong

PPNG i kalabus i stap long Darwin, Australia.

Na tu i gat wanpela reip keis we wanpela PNG man nau i stap long kalabus long Newcastle long New South Wales.

Mista Knight i tok Australia i no bin laik traim na lukluk

gut sapos ol dispela pipel i kamapim dispela ol rong tru o no gat.

Ronnie Knight i tok tripela sekyuriti gad bilong Australia em ol i bin sutim tok long ol long repim wanpela meri long Australian ditensen senta long Manus i bin ron-awe i kam long Australia na ol i no go bek yet long PNG long sanap long kot bihainim ol dispela sas.

Vanuatu Fainens minista bipo bai wokim apil



Willy Jimmy i krai bihainim Suprim Kot sas long braiberi na korapsen. *Poto: ABC*

Caroline Tiriman i raitim

WILLY Jimmy husat i gat saspended sentens bihainim braiberi na korapsen sas i tok dispela 10-pela yia na tu ol i no ken holim ol bikpela wok long gavman.

Tasol wanpela long ol, Willy Jimmy husat i gat saspended sentence, na husat i holim wok olsem Ckea teka Fainens minista i tok em bai askim kot long lukluk gen long dispela tingting bilong stopim ol long go long wok politik long wanem, em i tok dispela i no bihainim mama loa bilong Vanuatu.

ol sas long korapsen na gris mani.

Long Mande, SuprimKot i bin stopim ol tu long go insait long ol wok politik long 10-pela yia, na tu ol i no ken holim ol bikpela wok long gavman.

Tasol wanpela long ol, Willy Jimmy husat i gat saspended sentence, na husat i holim wok olsem Ckea teka Fainens minista i tok em bai askim kot long lukluk gen long dispela tingting bilong stopim ol long go long wok politik long wanem, em i tok dispela i no bihainim mama loa bilong Vanuatu.

PNG i noken dinau tumas

Croline Tiriman i raitim

I gat tok lukaut i go aut pinis long gavman bilong Papua New Guinea long noken bihainim ol pasin bilong em long ol yia 1990s we em i save kisim planti dinau tumas long helpim em long baim ol sevis bilong em long kantri.

Eksekutiv Dairekta bilong Institute bilong National Af-

fairs, Paul Barker i tok Nesenel Gavman i save hariap long tromoi bikpela mani bilong em antap moa long mani em i save kisim i kam long ol risos .

Em i tok maski i gat tingting long daunim mak bilong dinau o loan, ol i save laik kisim, sampela ol sevis olsem helt, edukesen na ol arapela bikpela sevis i wok long kisim taim.

Ol i kilim narapla PNG mama bihainim sanguma tokwin

John Papik i raitim

LONG PNG, hevi bilong kilim narapela pipel iusim ol pasin sanguma o sorcery i bin bungim planti toktok long sampela yia lig o pinis.

Dispela hevi i bin kamapen long pinis bilong las mun long Sauten Hailans we sampela pipel bilong ples Miruva, Yame, Porane na Mukiri long Kagua distrik yet i bin katim bodi bilong Susan Rote Dickson, long wanem, ol i sutim tok long en long em

i mekim sanguma pasin na kilim distrik helt opisa, Eliza Lisa.

Sauten Hailans Polis Komanda, Sibron Papoto, i tok dispela pasin bilong kilim nating ol pipal bihainim tokwin bilong sanguma em i bikplea wari tru nau long provins.

Komanda Papoto i tokim Redio Australia olsem ol pipel bilong dispela ol ples, i bin katim nogut tru bodi bilong Susan Rote Dickson, husat i mama na i gat 5-pela pikinini, na kukim long paia

PNG Power lukluk long sastenebel eneji miks

Aja Potabe i raitim

SIAMAN bilong PNG Power Larry Andagali i tok PNG Power bai isi isi tasol stopim olgeta pawa stesin we ol i save yusim disel fiul long kamapim pawa.

Dispela em i wanpela gutpela toktok i kam long bosman bilong PNG Power taim PNG wantaim ol arapela 200 kantri long wol i bin bung long Desemba 1 long Paris, Frans na ol i bin wanbel long daunim level bilong grinhaus ges na temperetsa i kam daun long 1.5 digri selsius.

Ol disel jenereta bilong kamapim pawa i save kamapim ol grinhaus ges o smok nogut bilong kamapim ples i hot na kamapim birua bilong klaimet senis.

"PNG Power bai isi isi tasol stopim ol disel jenereta bilong kamapim pawa. Mipela i laik kamapim klinpela pawa saplai kam long haidro, sola na ol arapela eneji miks, "Mista Andagali i tok.

Planti ples insait long PNG i save yusim disel fiul long kamapim pawa. Long Pot Mosbi, Moitaka pawa stesin na Kanudi pawa stesin i save yusim disel fiul long kamapim pawa.

Dispela kain pawa stesin bai no moa stap long PNG. Mista Andagali i tok PNG Power i tingting long kirapim ol nupela pawa saplai we i ken kamapim klin o sastenebel eneji.

Mista Andagali i tok PNG bai kisim pawa saplai long ol haidro pawa, ges, sola na ol arapela sastenebel eneji miks bikos PNG i laik daunim level bilong ol birua klaimet senis i save kamapim.

Mista Andagali i mekim dispela toktok long Mande taim em i sainim wanpela Pawa Peses Agrimen (PPA) wantaim PNG Hydro Development Ltd (PNGHD).

Ol bikman bilong PNG Power, PNGHD, Sainis Embesi na ol papagraun bilong Eduvu i bin kam witnessim

dispela agrimen seremoni long hetkwata bilong PNG Power long Hohola, NCD.

PNGHD bai kirapim nupela haidro long Eduvu, Sentral Provins. Eduvu i stap 40 kilomita ausait long Pot Mosbi na dispela haidro pawa projek bai kirapim 50 megawat pawa long saplaim Pot Mosbi.

Aninit long dispela agrimen, PNG Power bai baim pawa we PNGHD bai saplaim long Eduvu haidro.

PNGHD em i kampani bilong Saina na dispela haidro pawa projek i kamap aninit long Pablik Praivet Patnasip (PPP).

Mista Andagali i tok dispela haidro projek long Eduvu em i wanpela nambawan projek we dispela bai helpim PNG long apim level bilong pawa saplai i kam insait long Pot Mosbi.

"Dispela haidro pawa projek em i wanpela sastenebel eneji projek na em i wanpela gutpela projek we em bai apim level bilong pawa saplai long Pot Mosbi siti, we kapital siti bilong yumi i wok long gro na ol manmeri na bisnis haus bai nidim moa pawa,"Mista Andagali i tok.

Sif Eksekutiv Opisa (CEO) bilong PNGHD, Allan Guo Chao i tok kampani bilong en i stap redi long helpim PNG Power i kirapim klin eneji long PNG.

"Mipela i tingting long bihain taim bilong dispela kantri. Eduvu haidro bai kamapim klinpela pawa na aninit long dispela PPA, Eduvu haidro bai sapotim PNG Power long kisim moa pawa.

"Mipela i bilip olsem Pot Mosbi siti bai gro yet. Taim em i gro, em bai nidim moa pawa saplai. Long dispela as, mipela i lukluk go het long bihain taim bilong dispela siti na mipela i amamas long wok bung wantaim PNG Power aninit long PPP program bilong en,"Mista Chao i tok.

Wanpela mausman bilong



(Lephan) PNG Power ekting CEO John Yanis, PNG Hydro Development CEO Allan Guo Chao, na Siaman bilong PNG Power, Larry Andagali i soim PPA agrimen taim ol papagraun bilong Eduvu i sanap baksait. Foto: Nicky Bernard

gavman bilong Saina i sapotim dispela plen bilong PNG Power long stopim olgeta disel jenereta na kirapim sastenebel eneji tasol.

Ambesada bilong Saina, Ruiyou Li, i tok PNG i gat olgeta samting o risos long kamapim sastenebel eneji na dispela plen bilong kamapim klin eneji long PNG em i gutpela tru.

Mista Li i bin kam witnessim dispela saining seremoni.

"PNG i gat ol bikpela na strongpela wara i ran long maunten. Dispela em i gutpela long kirapim haidro pawa projek na kamapim moa sastenebel eneji,"Mista Li i tok.

Em i tok PNG i save kisim strongpela san na dispela em i gutpela tu long kirapim sola pawa.

Sola na haidro pawa em i gat bikpela sans long kamapim pawa saplai long PNG, Mista Li i tok.

Em i tok Saina i gat ol teknologi long kirapim sastenebel pawa. Saina i gat ol klin eneji teknologi we PNG i ken yusim dispela teknologi

long kirapim ol nupela haidro pawa projek na lus ting ting disel pawa jenereta.

Long Novemba 30, wanpela senia eneji saveman long World Bank i bin tok PNG i gat olgeta risos o ol samting bilong kirapim sastenebel eneji.

Kamleshwar Khelawan, husat i senia eneji spesialis bilong World Bank, i tok PNG i gat ol risos bilong kamapim haidro pawa, sola pawa, win pawa, baiomas, jiotemal pawa na taidel pawa.

Dispela em ol samting o risos bilong kamapim sastenebel pawa o klin eneji na World Bank i luksave pinis olsem PNG i gat dispela olgeta risos i stap.

"Wol Bank i sapotim ol Pasifik Ailan kantri long kirapim sastenebel eneji. Mipela i laik helpim ol Pasifik Ailan kantri i no ken yusim ol disel fiul jenereta o ol arapela kain fosil fiul long kamapim pawa,"Mista Khelawan i tok.

Taim planti ol Pasifik ailan i wok long bungim bikpela birua bilong klaimet senis na

level bilong solwara i wok long go antap, gavman bilong ol i mas promotim sastenebel eneji bikos dispela em i wanpela rot bilong daunim klaimet senis birua.

Long wankain taim, Ekeketiv Dairekta bilong Pasifik Pawa Asosiesen, Andrew Daka, i tok PNG em i wanpela kantri insait long Pasifik we em i gat olgeta samting long kamapim klin eneji na gavman i mas yusim gut ol dispela samting long kirapim ol gutpela samting long kamapim nupela sos bilong kamapim klin eneji.

"PNG gavman i mas luksave olsem kantri bilong en i gat ol gutpela wara i ran long maunten long kirapim haidro pawa saplai. Sampela kantri i no gat dispela kain wara.

"San i save kam gut long ol nambis ples long PNG. Pot Mosbi eria i save kisim strongpela san. Dispela i ken kamapim sola pawa projek.

"Wara bilong Flai Riva em i strong tumas. Solwara bilong Milen Be provins em i strong tumas. Dispela tupela

eria i ken kamapim taidel eneji we i ken yusim strong bilong wara o karen bilong wara long kamapim pawa.

"Ol ples arere long solwara i save kisim strongpela win tu. Yumi ken kamapim win eneji long dispela kain strongpela win,"Mista Daka i tok.

Em i tok ol narapela Pasifik ailan kantri i les long yusim ol disel jenereta na ol i laik kamapim klin eneji long san na win.

Mista Daka i tok sampela taun na ples long PNG i save yusim disel jenereta long kisim pawa saplai.

"Maski PNG i gat olgeta samting long kirapim klin eneji tasol PNG i save yusim ol disel jenereta long kisim pawa saplai,"Mista Daka i tok.

Em i singautim gavman long inves long ol sastenebel eneji projek bikos PNG em i bikpela kantri long Pasifik ailan na dispela bai soim ol arapela liklik kantri long riji olsem PNG em i mekim tru sampela samting long pait egensim birua bilong klaimet senis.

Asidokona kisim Tolukuma Gol Main

PETROMIN PNG Holdings i salim pinis Tolukuma Gol Main long Sentral Provins. Asidokona Mining Resources PTE Limited bilong Singapo i pinisim ol agrimen bilong baim sea bilong dispela namel sais gol main we Petromin i bin lukautim.

Mening Dairekta bilong Petromin, Thomas Abe, i tok Tolukuma Gol Maining i no save mekim winmani tasol em i save westim bikpela mani bilong Petromin.

"Long yia 2008 i kam inap nau, Petromin i bin lusim K170 milien. Em i no bin mekim winmani long dispela gol maining na bot na menesmen bilong kampani i wanbel long salim,"Mista Abe i tok.

Long Oktoba 7, Petromin bin sainim sels agrimen wantaim Asidokona long larim Asidokona i baim Tolukuma gol main.

Long Desemba 2, Petromin i givim olgeta pawa bilong lukautim na ranim maning long Asidokona. Hendova tekova seremoni i bin kamap long Tolukuma main sait yet we ol ol maus man bilong Asidokona, ol papagraun, Mineral Risos Atoriti (MRA), Petromin na Sentral Provinsal Gavman i bin witnessim.

"Mi amamas long tokaut tude olsem Petromin i stretim pinis ol samting bilong salim Tolukuma Gol Main na nau Asidokona bai kamap nupela papa bilong dispela gol main,"Mista Abe i tok.

Em i tok Petromin i no save mekim wanpela winmani tasol i wok long lusim planti mani long opretim dispela main taim prais bilong gol na kopa long wol maket i pundaun go daun.

"Mipela i amamas nau bikos

Petromin bai no moa westim bikpela mani gen long dispela main,"Mista Abe i tok.

Em i tok salens bilong kirapim gen opresen bilong maining i nau stap wantaim Asidokona. Asidokona bai givim 10 pesen fri keru ekwiti long ol papagraun bilong Tapini.

Ol papagraun bilong dispela maining projek bai gat 10 pesen sea we ol bai no inap long baim long mani tasol em i fri.

Asidokona i tok em bai kirapim wanpela nupela rot projek long joinim Tapini wantaim Hiritano Haiwe na larim ol pipel i kisim sevis.

Dispela tupela poin i bin mekim Petromin i wanbel long salim Tolukuma i go long Asidokona.

Tasol sampela papagraun i no gat bilip long Asidokona.



Poto i soim wanpela PMV bas long Kiunga ples balus long Westen Provins i laik kisim ol pasindia i go long Kiunga taun. San hot bilong Kiunga em i narapela kain stret. Daru ailan i no hot tumas tasol Kiunga em i hot nogut tru. Dispela hot san na drai weda i daunim level bilong Flai Riva i go daun. Ol manmeri i hat long kisim kaikai saplai bikos ol sip i hat long karim ol kago i go long Kiunga. Dispela i mekim na ol manmeri i kisim taim. Ok Tedi Maining i stopim ol opresen bilong maining bikos long dispela as tasol. Foto: Aja Potabe

MiBank lonsim nupela ATM kad - MiCard

Air Niugini givim K20 milien winmani



Wanpela kastoma i yusim MiCard long baim ol kaikai long stoa.

Nationwide Microbank (MiBank) i lonsim nupela ATM na EFTPOS Kad ol i kolim MiCard. Menesing Dairekta, Tony Westaway, i tok "dispela nupela kad bai kisim ples bilong ol wan wan pasbuk seavings akaun wantaim MiBank.

Oi kastoma bilong MiBank bai yusim dispela nupela kad long rausim mani na kisim mani long olgeta 12 brens bilong MiBank long PNG.

Oi kastoma bilong MiBank husat i gat MiCash Mobail Walet ba kisim nupela MiCard.

"Ol manmeri long ples i ken yusim MiCash Mobail Walet long mekim benking taim ol i stap long ples, tasol ol i ken yusim MiCard taim ol i kam long taun," Mista Westaway i tok

Mista Westaway i tok em i amamas long tokaut olsem MiBank i sainim wanpela agrimen ol i kolim 'acquirer' agrimen wantaim Benk Saut Pasifik (BSP).

Bihainim dispela agrimen,

ol manmeri husat i gat MiCard i ken yusim dispela dispela kad long olgeta ATM na EFT-POS masin bilong BSP. Oi i ken yusim long ol brens na netwok bilong MiBank yet.

"Mi tok tenkyu long ol manmeri husat i bin wok long dispela projek. Wok manmeri bilong BSP na MiBank wataim i bin wok long dispela projek, we i nau karim kaikai. MiBank i tok tenkyu long BSP long kamapim dispela patnasip, we mi bilip olsem dispela em i gutpela samting long kirapim fainensal inklusen long PNG," Westaway i tok.

MiBank i lukim olsem dispela nupela prodak bilong em, MiCard, i bai senisim dispela benk na kirapim dispela olpela maikro benk insait long kantri.

MiBank i bin statim bisnis long long yia 2004 aninit long nem Wau Micro Bank na long yia 2008 em i senisim nem bilong en i go long Nationwide Microbank.

Taim PNG i lukim planti maikro benk i kirap, ol senisim

nem i go long MiBank long larim ol manmeri i noken paul go kam taim ol i lukim nem.

MiBank i kirapim planti ol nupela samting long maket. Long yia 2011, MiBank i kamapim namba wan Mobail Mani long Saut Pasifik we ol i kolim MiCash; kamapim patnasip wantaim Pacific MMI Insurance long kirapim namba wan maikro insurens prodak long PNG we ol i kolim MiLife; na i no long taim tasol i kamapim Mifx onlain foren karensi payment sistem aninit long patnasip wantaim Heduru Moni Limited.

Long painimaut long kisim MiCard o long kisim narapela infomesen long MiBank yu ken ringim Kol Senta long Digicel 16789.

BALUS kampani bilong gavman, Air Niugini, i mekim K20 milien winmani na givim i go long gavman.

Kumul Konsolidetet Holdings (pastaim IPBC) i makim maus bilong gavman na kisim dispela winmani.

Siaman bilong Air Niugini bod, Sir Frederick Reiher, i tok tenkyu long gavman na Praim Minista Peter O'Neill long sapot em i save givim long kirapim dispela bikpela balus kampani bilong gavman na pipel bilong PNG.

Sir Frederick i tok bikpela

sapot Air Niugini i save kisim long Praim Minista Peter O'Neill, Pablik Entaprais Minista Ben Micah, ol arapela kabinet minista na Kumul Konsolidetet Holdings i bin helpim dispela balus kampani long ran gut na mekim dispela bikpela winmani we gavman i kisim.

"Mi laik tok tenkyu long ol hatwok, strepela pasin na strongpela bilip bilong menesmen tim na moa long 2, 000 wok manmeri, husat i bin wok bung wantaim long gutpela taim na taim nogut bilong Air

Niugini," Sir Frederick i tok.

Em i tok taim ol konstraksen wok bilong PNG LNG Projek i pinis, Air Niugini i bin mekim gutpela mani tasol tude ol konstraksen wok i pinis na Air Niugini i bungim sampela salens.

"Tasol mipela bai mekim sampela senis long sevim mani na larim kampani i ran gut. Ol manmeri i nambawan kastoma bilong Air Niugini na mipela bai mekim ol dispela senis long larim balus i ran gut na givim gut sevis long ol pasindia," Sir Frederick i tok.



KCH bod siaman, Paul Nerai i kism K20 milien sek long Air Niugini CEO, Simon Foo (namel) na bod Siaman, Sir Frederick Reiher (raithan).

Kastoma ken yusim bmobile long Australia

OL kastoma bilong bmobile-vodafone i ken yusim mobail pon bilong ol long Australia, CEO bilong bmobile-vodafone Sundar Ramamurthy i tok.

Mista Ramamurthy i tok ol manmeri husat i holim bmobile-vodafone bai nau inap long yusim bmobile sim long Australia.

Dispela mobail pon kampani bilong PNG i luksave olsem moa 200, 000 manmeri i stap long PNG i save go long raun long Australia na dispela i kirapim tingting long kamapim wanpela sistem wantaim Vodafone Australia we dispela bai larim ol pripeid kastoma

i yusim bmobile-vodafone long olgeta hap long Australia.

Bihainim patnasip bilong bmobile na Vodafone, bmobile i kirapim dispela nupela sevis long larim ol kastoma i no ken kisim hat taim long senisim sim kad bilong mobail taim ol i go daun long Australia.

"Dispela bai larim ol pripeid kastoma bilong bmobile-vodafone i amamas long yusim dispela nupela sevis," Ramamurthy i tok.

Em i tok bmobile-vodafone i bin wok hat tru long larim dispela i kamap.

"Mipela i bin mekim hatwok na nau dispela hatwok i karim kaikai.

Ol kastoma bilong yumi bai no inap sensim sim kad bilong ol taim ol i go long Cairns, Brisbane o Sydney.

"Ol i ken kamap long hap na onim mobail pon bilong ol na tanim netwok i go long Vodafone Australia na bmobile-vodafone netwok bai wok," em i tok.

Sas bilong kol long wan wan minet em K1.50 tasol sapos ol pripeid kastoma i stap long Australia na kol bek long PNG.

Mista Ramamurthy i tok bmobile-vodafone i gat plen long larim dispela kain sistem i stap long olgeta siti na kantri we Air Niugini balus i save go pundaun.

Have YOU got your MiCard yet?

- ▶ MiCard is available from any branch of MiBank nationwide
- ▶ MiCard can be linked to a MiCash Mobile Wallet or Savings Account
- ▶ MiCards can be used with BSP ATMs and BSP POS agents
- ▶ MiCard is the Card of choice for ordinary Papua New Guineans

CALL MIBANK
16789
www.microbank.com.pg

Rot wok long Lorengau kamap gut

WOK bilong stretim ol rot namel long Momote Epot i go long Lorengau taun long Manus em i kisim mani long Gavman bilong Australia olsem hap bilong helpim bilong ol i go long Manus Provins.

Dispela invesmen bai kamapim gut ol rot, olsem long putim kolta bai kamapim gut tru ol rot long daunim taim bilong ron namel long ol ples long bringim sevi s i go isi long ol lokal komyuniti.

Wantaim wok bilong putim kolta long rot, mentenens wok i wok long kamap aninit long dispela projek bai gat bris mentenens na rihabilitasen bilong ol eria i stap arere long nupela maket bilong Lorengau we Australia i bin fandim tu.

Oi wok bilong rihabilitasen arere long maket bai kamapim gutpela drein na stretim rot long stopim ol wara tait long taim bilong ren. Nupela sait rot bilong wokabaut arere long maket bai kamap gut bilong ol pipel wantaim disabiliti inap long wokabaut antap long en.

Gavana bilong Manus

Charlie Benjamin i tok, "Dispela projek i min olsem mipela i gat trupela samting bilong ol pipel bilong Manus i kisim helpim. I no bilong ol wok we em i kamapim nau tasol em underway means real and tangible benefits for the people of Manus. Em i gat gutpela samting olsem ol man i gat wok na tu ol arapela gutpela samting bai kamap taim i gat gutpela rot.

"Kamapim strongpela transpot netwok bilong mipela we bai sanap long taim bilong bikpela solwara na bikpela ren em i namba wan long helpim ol pipel bilong mipela na ol lokal bisnis long ol inap long wokim maket yet na kisim ol sevis olgeta taim," Mista Benjamin i tok.

Wanpela maus man bilong Australia Hai Komisen i tok olsem fanding bilong Australia long stretim ol transpot infrastraka bilong Manus helpim long putim as bilong ikonmik na sosel divelopmen long Manus, bikos gutpela rot na bris i save mekim isi long ol sevis i kamap isi na em i save bungim ol pipel wantaim ol pipel wantiam ol sans long ikonmik helpim.



Oi hap bilong rot i kamap gut nau, namel long Momote Epot na Lorengau taun bilong Manus Provins. Stori na poto i kam long AusAD.

Australia mani stretim Kieta basis rot

AUSTRALIA na Atonomas Bogenvil Gavman i statim pinis wok bilong stretim isimen bilong rot long redim wok bilong putim kolta gen stat long Arawa i go long Rigu Bris, long Kieta.

Dispela em i wanpela projek long sapotim moa egrikalsa eksport long kamap na long ol lokal bisnis na ol lain konsiuma o ol lain i baim samting.

Wok we Dekenai, Bogenvil Earth Works, Kampani na Eastrac i wokim, em i wanpela hap bilong bikpela K13.3 milien projek we i karamapim tu Arawa taun rot we ol i bin wokim pinis.

Rot bilong Arawa Taun i go long Rigu Bris i bungim Kieta Basis wantaim olgeta hap bilong Sentral Bogenvil na i go long ol narapela distrik.

Dispela basis i bringim moa long 150 kontena long wanwan mun i go insait long

Kieta. Em i bungim ol samting bilong hadwe, bilding saplai, stua samting bilong salim, marasin saplai na moa.

Menesa bilong Kieta Basis, Charlie Tabura, i tok olsem wok bilong stretim rot ba helpim Bogenvil gut tru.

"Gutpela rot bai daunim taim bilong ran long rot na ol kar mentenens kos bai go daun na tu em bai seif long ol lain i ran long kar. Ol dispela bikpela samting bai helpim ol lokal bisnis na ol lain i baim samting," Mista Tabura i tok.

"Kieta Basis i save salim ol kakao na kopra bilong asples stret i go long ol longwe kantri olsem long Singapore na Nu Silan. Dispela rot bai sapotim Bogenvil egrikalsa sekta long go bikpela." Mista Tabura i tok.


"Eking Hai Komisina bilong Australia, Bronte Moules, i tok olsem dispela projek bai

helpim moa long kamapim gutpela transpot netwok bilong Bogenvil.

"Australia i amamas long em inap long putim mani bilong helpim ol dispela wok long kamap gut long bungim ol piple na bisnis bilong Bogenvil. Kain kain stail bilong transpot nau bai i ken bung long gutpela na seif we na bai mekim bikpela senis long rijon," Mis Moules i tok.

Oi lokal kontrakta i redi pinis long statim wok bilong 10 kilomita rot.

Dispela em i wanpela projek bilong AusAID aninit long Transpot Sekta Sapot Program (TSSP). TSSP tasol i bin putim kolta long rot bilong Morgan Rot bung i go long Tunuru antap long ol wok mentenens bilong ol mein rot bilong Bogenvil long Arawa saut i go olgeta long Buin, Tonu, Sovele, Jaba na Panguna.



Rot i go long Kieta Basis.



GLASIM RAMU NICO PROJEK



"Wampela Ramu NiCo, Wampela Komuniti"

Ramu NiCo helpim ol Luteran kongrigesen long amamasim Krismas kendol nait



Ramu NiCo CA supavaisa Nick Genaia givim toktok Ganglau Luteran kongrigesen na givim presen.

RAMU NiCo Menesmen (MCC) long Tunde dispela wik i soim gutpela pasin stret long givim liklik helpim bilong en i go long 8-pela Luteran Sios kongrigesen long ol viles insait long Raikos distrik long selebretim kendol nait bilong ol long Krismas neks wiken.

Dispela ol 8-pela viles i stap klostu long bikpela rifaineri bilong Kampani long Basamuk.

Komyuniti Afes Dipatmen wokman bilong Ramu NiCo long Basamuk Rifaineri i bin go long 8-pela viles sios kongrigesen we ol i givim beg rais, katen bisket na nudels, beg suga na ol paket kofi na kofmeit i go long sios hetman long ol i ken serim wantaim ol kongrigesen bilong ol long Krismas.

Basamuk CA Dipatmen Suprintenden, Andy Hu wantaim sinia supavaisa, Nick Genaia, Lens Opisa, Leffy Ovosa na lo na oda opisa Dubam i bin stat givim ol donesin long Mingming i go olsem long Buf, Kulilau, Tugyak, Ganglau, Jangag, Bobidik na Mindre. Long Trinde, ol lain long ples Dein I go kisim tu presen bilong ol.

CA Supavaisa Mista Genaia i tokim ol manmeri olsem nau long dispela taim Ramu NiCo i bungim hatpela taim tru na bikpela salens i stap bikos prais bilong nikel metal long wol maket i pundaun stret na planti ol maining kampani i kisim bikpela bagarap tru.

Tasol Ramu NiCo i luksave olsem Krismas em spesel taim insait long Kristen kalenda we ol Kristen manmeri insait long ol komyuniti arere long en i mas amamasim dispela taim, olsem na liklik em i gat long en em i givim.

"Ramu NiCo i givim dispela liklik helpim i go long yupela wantaim bel bilong em," Mista Genaia i tok.

CA Suprintenden long Basamuk, Mista Hu i tok tenkyu tu i go long ol lokal komyuniti long sapot bilong ol long Ramu Projek long ol yia i go pinis, na i tok em trupela tok olsem Kampani nau i stap long taim nogut stret bikos prais bilong nikel long wol maket i pundaun na bagarap stret. Tasol em i tok Kampani i luksave olsem ol lokal komyuniti insait long projek eria em bikpela samting long go het bilong Projek, olsem na ol i givim liklik helpim i go long ol Kristen manmeri long amamasim Krismas.

Sios hetman long Kulilau, Koi Sapum i givim bikpela tok tenkyu i go long Ramu NiCo long dispela liklik ol helpim wantaim kaikai.

Guhu wod 31 kaunsela bilong Saidor LLG, Degge Dou i makim kongrigesen long givim bikpela tok tenkyu na tok amamas i go long Ramu NiCo.

Dou i tok nau tasol planti ol manmeri i wok long stretim gaden bilong ol bikos bikpela san i bagarapim gaden kaikai bilong ol. Olsem na ol i wok long tingting planti tru long wanem samting long wokim long selebretim Krismas. Olsem na dispela helpim Ramu NiCo i givim em bikpela samting tru na ol i amamas tru na bai serim gut wantaim olgeta Kristen kongrigesen na amamasim kendol nait long Krismas

Sios hetman bilong Mindre viles, Sonny Katu i tok tenkyu tu long Ramu NiCo na i tok amamas bilong Krismas 2015 na Hepi Nu Yia 2016 i go long olgeta wok manmeri na menesmen bilong Ramu NiCo.




Mindre sios hetman Sonny Katu tok tenkyu long Ramu NiCo BSK CA Suprintenden Andy Hu.

Jangak kongrigesen amamas long donesin.



Luteran kongrigesen long Kulilau amamas long presen we Ramu NiCo i givim.



Givim spia long kandre



Sangau Maneu i soim ol kain kain spia wantaim tit bilong ol.
Foto: James G. Kila

James G. Kila i raitim

MASKi olsem planti kain kain nupela teknoloji i kam insait long kantri bilong yumi, planti rurel pipel bilong PNG i holim strong yet ol kastom na pasin tumbuna bilong ol.

Long las mun, Sanga Maneu bilong ples Orinma long maunten bilong Finistia Rens long Raikos distrik i mekim wanpela kastom wokabaut longpela rot stret i go olgeta long nambis long ples Duman klostu long Basamuk. Dispela wokabaut em long bringim ol spia na bunara i go long lukim wanpela kandre bilong em, husat i kam ausait long hausman namba wan taim.

Em i wanpela kastom bilong Madang na planti hap bilong kantri tu long ol yangpela mangi i save go insait long haus man long lainim wei bilong kamap bikpela man na mekim wok olsem bikpela man, pastaim long ol i kamap man tru. Sanga i bringim presen long kandre bilong soim amamas bilong em long yangpela man i holim yet pasin kalsa bilong ples.

"Mi olsem kandre man bilong yangpela man ya, mi bringim presen bilong em longwe tru i go daun long nambis long Duman long givim em bikos taim em i kamaut long hausman em soim

olsem em man nau, "Olsem na taim mi givim em ol spia long em, mi givim em strong na tu givim em tingting olsem em mas wokabaut olsem man na em i no pikinini moa," Sanga i tok.

Sanga i stori olsem em i slip wanpela nait long bus na wokabaut i go kamap long Basamuk.

Wantok Niuspepa i bungim Sanga long ples Jangag taim em i go kisim malolo long haus bilong wanpela hetman long hap nem bilong em Wass Sakor.

Sanga i tok olsem long bipo taim bilong ol tumbuna spia na bunara em olsem gan bilong ol. Spia na bunara i save tok na ol save kaikai gutpela abus wantaim gaden kaikai na kumu na dring gutpela sup.

Em i stori na olsem ol spia ya i gat kain kain mak o tit bilong ol. Taim yu sutim wanpela enimal em bai go insait long pas gut stret na save brukim skin na bun bilong enimal tu wantaim.

Em i tok tu olsem ol tit bilong ol spia i gat kain kain seip we i bihainim ol rot na pasin ol tumbuna bilong ol bipo i save wokim spia.

Plantu ol rural eria long PNG i wok long yusim spia na bunara yet long painim ol abus olsem mumut, pisin, wail paul na tu pik, muruk na sikau long bus.

Digicel Men ov Ona nominesen klostu i pas nau



Ol 5-pela men ov ona bilong 2014 Men ov Ona (L-R) Mamindi Pym (Hertz Leasemaster - Komyuniti Entrepreneur Awod Wina), Pinjiki Wak (Atlas Steel -Komyuniti Ingenuity Awod Wina), Jimmy Drekore (2014 Digicel PNG Fondation Men ov Ona na Digicel Komyuniti Lidasip Awod Wina), Wamala Ila Rova (Nesene! Niuspepa -Komyuniti Edukesen Sempion Awod Wina) na Alu Poka (TVWAN - Spting Mento Awod Wina).

KLOSTU taim nau bai nominesen bilong makim ol Men ov Ona bilong 2016 Digicel Faundesen PNG Men ov Ona Awod i pas long Janueri 31, 2016.

Dsipela i namba tu yia long Digicel i holim dispela gutpela pasin bilong luksave na givim sampela bekim bilong ol man husat i save wok strong long helpim na strongim ol pipel long stap gut long ol komyuniti.

I gat 5-pela kategori i stap insait long awod olsem Komyuniti Ingenuity, Spoting

Mentor, Komyuniti Entrepreneur, Komyuniti Edukesen Sempion na Komyuniti Lidasip.

Digicel Faundesen CEO, Beatrice Mahuru i tok ol komyuniti i mas luksave long ol strongpel man husat i save soim gutpela piksa na selebretim ol gutpela pasin bilong ol olsem piksa bilong ol narapela long bihainim.

"Mipela faundesen i laik brukim pasin bilong vailens taim mipela i lukluk long wanem ol gutpela pasin ol man i gat na mipela i putim

long ples klia," em i tok.

"Men ov Ona Awod i luksave long ol man i gat gutpela lain na mi laik invaitim planti man olsem long kam wantiam mipela na lusim gutpela stori bilong ol yet long bihain," em i tok.

I gat 392 nomesens bilong dispela yia namba wan awod wantaim wanpela independen panel jas i makim 15 man long pinisim resis n alas true m 5-pela wina i kamap.

Ol lain husat mipela bai makim, Epril awod seremoni

em bai stat tasol bilong wokabaut bilong ol insait long program.

Ol wina bilong dispela yia awod i bin mekim ol kain kain wok long komyuniti olsem ol woksop long lidasip na edvokasi, go long ol skul long skulim ol yangpela long gutpela pasin bilong mekim wok.

Bilong nominetim wanpela man yu laikim bai go insait long resis, plis salim email i kam long digicelpng-foundation@digicelgroup long kisim aplikesen fom.

BSP Komyuniti projek helpim skul



Kriket net long Popondetta Sekenderi Skul (nامل) Eileen Goviro wantaim Deputi Prinsipel i katim ribon bilong nupela kriket kot net wantaim ol sumatin.

OL kriket trening net long Popondetta Sekenderi Skul nau i pulim ai bilong pablik bikos long wanem samting Benk Saut Pasifik (BSP) i bin mekim.

BSP Popondetta brens wokman na meri i putim han bilong ol long graun na kisim 4-pela wiken bilong ol long digi, rekim, na putim ol net na penim ples bilong trening.

Deputi Prinsipel bilong Popondetta Sekenderi Skul, Lawrence Suto i amamas tru

long kisim dispela mentenens long ol kriket pilai eria bilong ol na em i tok tenkyu long BSP long helpim bilong ol.

"Nupela fasiliti bai kirapim intres bilong ol yangpela kriket pilai long yusim long lainim ol stail bilong pilai," Mista Suto i tok.

Brens Menesa, Eileen Goviro husat i bin go pas long seremoni bilong opim ol ples bilong pilai, i bin tok olsem BSP i luksave olsem sapos i gat ol rait fasiliti long

wokim trening, em bai helpim ol yangpela kriket pilai bilong Popondetta long kamapim gut stail bilong pilai.

"Mipela i laikim ol sumatin na ol lokal komyuniti long lukautim gut ol dispela hap bilong pilai na yusim long kamapim gut ol stail bilong yupela," Mis Goviro i tok.

Long wankain taim long Arawa, BSP Tim i wokim pinis wanpela bas stop haus long mein taun maket. Ol lain long ples nau inap long sindaun gut

aninit long haus na wetim ol PMV long kam. Dispela projek tu i bin kamap long wankain wei olsem long Popondetta na em tu i bin kisim 4-pela wiken bilong ol wokman na wokmeri bilong lokal BSP brens long mekim wok long en.

Taun Menesa bilnog Arawa, Mark Sivutare i tok tenkyu tru na i tok moa olsem gutpela bas stop eria bai helpim ol lokal lain long maket long kism kar isi long go bek long ples na haus.



Khawaja i wokabaut isi isi tru bihain em i kisim bagarap.

Usman Khawaja bai no ken go long Sydney long opening Big Bash League

Usman Khawaja i gat 28 krismas bai wokim fitness tes long dispela wik long painaut sapos em i gat sans long stap lon tes arena long Boksing De.

Khawaja i sapos long go bek pilai bihain long bagarap em i kisim long las Fonde opening Big Besh Lig (BBL) pilai bilong ol Sydney Thunder.

Tasol Kriket Australia medikel woklain i tok em bai no inap pilai yet long dispela

wiken tu egensim ol Sixers.

Khawaja i mas soim olsem em i fit long pilai bipo long pilai long Sande egensim ol Melbourne Stars. Dispela i laspela pilai bipo long Boksing De Tes egensim ol Wes Indies long MSG.

Sapos em i feilim dispela tes, ol selekta bai gat hatpela taim long painim narapela pilaia long kisim ples bilong em namel long tupela pilai olsem Joe Burns o Shaun Marsh.

Khawaja i wanpela strongpela pilaia bilong Australia i bin pilai egensim Nu Silan we em i bin wokim ol senseri long Gabba na WACA bipo em i kisim bagarap.

Kepten blong tim bilong Australia, Steve Smith i kisim bagarap tu long skru bilong em taim ol i pilai long MCG Test, ana em bai no inap pilai long opening bilong tupela Sixers BBL pilai.

Ol i ting em bai orait long Boksing De Tes.

Conor McGregor i kisim tasol 13 sekond long win



Conor McGregor i kamap UFC fedaweit sempion.

McGregor i givim strongpela lef pans i go long jo o maus bilong sempion Jose Aldo, na nokim em i go daun na givim em namba tu lus insait long 27 profesenel pait bilong em.

Man bilong toktok bilong Ireland i mekim gut na sanap long mak 19-2 na em i win.

"Em i gat bikpela pawa na en i fas, tasol taim stret long mak i winim pawa na pawa i winim spit," man i gat 27 krismas i tok long Aldo.

"Mi sori long Jose bikos em i bin wanpela biknem sempion," McGregor i tok.

Aldo i bin singaut long rimets bikos em i tok pait bilong ol long Las Vegas long Sunday (AEST) "i no fea pait".

IAAF i ivim tok kliia long Rasia Atletiks Federesen



IAAF Presiden Sebastian Coe.

OL i givim ol kliia toktok i go long Atletiks Federesen bilong Rasia long eksen em i mas mekim na wanem ol samting em i mas putim bipo ol i kisim em bek, IAAF i bin tok long Sande.

Intanesenel Asosiesen bilong Atletiks Federesen (IAAF) i pablisim longpela lista we ARAF i mas inapim bipo ol i rausim tambu ol i bin putim long kisim drag.

Ol bin saspensim Rasia long las mun bihain long ripot Wol Anti-Doping Ejensi (WADA) independen komisin we i bin soim long ples kliia ol pasin korapsen we stet i sponsaim ol pasin bilong kisim drag na ol arapela samting.

Rusia i wanbel long tambu na em i promis long bihainim ol daireksen bilong IAAF long go bek.

Ol etlit bilong Rasia bai no nap pilai long wol indo sempionsip long Amerika long Mas neks yiana fesim resis egensim taim bipo ol i kliiarim ol na ol i ken go insait long Olympics long Rio de Janeiro neks yia Ogas.

IAAF i tok Rasian Federeesen i mas soim olsem ol dairekta, ol opisa o ol woklain i no gat koneksen long drag taim ol i putim ol nupela lo long bihainim.

IAAF task fos bai wokim namba wan inspeksen long Rasia long mun Janueri neks yia.



Lionel Messi i selebretim gol bilong em we em i kikim long Argentina egensim Bosnia-Herzegovina.

BARCELONA supasta, Lionel Messi, i no amamas long ol laini wokim planti toktok egensim Argentina nesenel tim long wanpela TV intaviu we em i autim bikpela bel hevi bilong em.

Taim Messi i go pas long Argentina, ol i lusim tupela bikpela fainel insait long tupela yia.

Ol i bin lus 1-0 long Germany long Wol Kap fainel long Brazil na tu, go daun long hos Chile, long penalti long fainel bilong 2015 Copa Amerika.

Foapela taim wina bilong Ballon d'Or, Messi i no gat gutpela stori tumas wantaim sampela fen long asples bilong em, Argentina.

Taim planti lain long Argentina i lukluk long em olsem wanpela bikpela na biknem pilaia namba 10 long kantri bilong ol, sampela narapela i komplem olsem em i no soim gutpela rol modol olsem Diego Maradona i bin wokim.

Messi i tokim TyC Sports olsem ol dispela lain i komplem long en i mas mekim kliia ol samting long ol komplem bilong ol.

"Mi save kros taim ol i tokim mipela, putim moa strong, yu no pilim siot," em i tok.

"Mipela i bin laki long go insait long Wol Kap na Copa America, na dispela i olsem mipela i no wokim wanpela samting

"Mipela i bin go insait long tupela fainel, em i belhat na autim tok nogut.

"Mipela i no win, tasol bai olsem wanem, mipela i bin go long fainel, mipela i no lus long raun 16."

Messi i bin pilaia bilong tonamen long 2014 Wol Kap, tasol pilai bilong em i bin go daun long nok aut hap na em i no mekim bikpela impek long fainel.

Sampela lain long Argentina i tok taim Messi i pilai long Argentina, em i no save soim wankain strong na laik em i save soim taim em i pilai long klap bilong em, Barcelona, we em i mekim gut tru long sampela yia nau.

Nau Argentina i sindaun long namba tu posisen long FIFA renking taim Messi i namba tu long all taim skora lista long kantri bilong em. Em i kam 7-pela gol bihain tasol long Gabriel Batistuta

Ol stori na foto i kam long ABC

Jack Hale i winim anda 18 rekot

SPRINTA Jack Hale i lukluk long brukim anda 18 100 mita sprint nesenel rekot bilong em bihain en i difendim taitel long Australia All Schools taitel long Victoria.

Hale i bin difendim taitel bilong em long taim mak long 10.56, tasol i feil long brukim rekot 10.42 em i bin kamapim long las yia.

Em i go bek long Hobart, tasol i mas go long Perth long disepla wik long stap insait long ran resis i kamap long hap.

Hale i gat 17 krismas i

amamas long 100 mita sprint win bilong em long tupela taim nau insait long tupela yia.

"Em i givim mi planti bilip long mi yet long go fowed nau long ol bikpela sempionsip bai kamap long mun Mas neks yia, Australien junia trail, na trening long hap na hia na sut i go long wol sempionsip," em i tok. Hale i tok long nau, em i laik wok strong long spit bipo long fainel resis we nem i laik brukim anda 18 rekot bilong em yet.



Jake Hale i ran long wol sempionsip.

Taekwando PNG kirapim paia long NCD

LONG dispela wik Sande bai bikpela nois i kamap long Taurama Akwatik Senta long Mosbi, taim Taekwando PNG i kamapim las tonamen bilong en long makim ol lain husat bai stap insait long trening kem bilong Olimpik Gems long Rio. Dispela tonamen bai stat long 10 klok moning.

Presiden bilong Taekwando PNG, Peter Miria i tok TPNG i kamap strong nau na ol i mamas long lukim dispela tonamen i kamap we ol bai makim ol etlit long karim nem bilong PNG.

'Long dispela wiken bai

mipela i makim 4-pela man na 4-pela meri na bai ol i joinim ol arapela TPNG Olimpik elit skwat.' Miria i tok. Em i tok PNG i gat sans long lukim wanpela etlit i kwalifai long Rio Olimpik Gems long taim ol gem i kamap long NCD long Februari 27, 2016.

Ol etlit husat i laik stap long tim bilong PNG i bin kwalifai long taim bilong Pasifik Gems na long ol rijonal seleksen tonamen em Taekwando PNG i bin go pas long en.

Bai i gat ol tim i kam long olgeta hap bilong kantri long stap insait long dispela tonamen long Sande. Ol tim

olsem Toma Eagles, Kerevat TKD Club, Bitapaka TKD Club bilong Is Nu Briten, Buin 13 TKD Club bilong Bogenvil, Soccay TKD Club, PNG Youth TKD, NCD TKD, Don Bosco TKD Club, CK Elite TKD, Xtreme TKD Club na Kassmans TKD Clun long NCD na Sentral.

Ol lain olsem tu-taim Olimpian bilong PNG Theresa Tona na 2014 Nu Silan Sempion, Rainer Pennie, 2015 Gol Medalis Bobby Willie na 2015 Australian Open Sempion Maxemillion Kassman i kamap tu long dispela tonamen.

IOC tokaut long ol senis bilong was long spotmanmeri

EKSEKETIV Bod bilong Intenesenel Olimpik Komiti i tokaut long plen bilong en long bihainim ol stretpela pasin bilong mekim ol wok na pasin bilong lukautim ol klinpela spotmanmeri. IOC i bin pasim tok long dispela tupela bikpela samting long miting bilong ol long Swiselan long Desemba 8 i go inap 10.

Komiti i skelim ol toktok i kam long ol spot ogenaiesen husat i wari olsem ol asua sampela spot ogenaiesen i kamapim, i save bagarapim gutpela nem bilong ol tu.

Planti ol Intenesenel Federesen (IF) na ol Intenesenel Olimpik Komiti (IOC) i wok strong long kamapim gud gavenens long spot. Olgeta lain insait long Olimpik Muvmen i wanbel long bihainim ol dispela agrimen aninit long Olimpik Ajenda 2020.

Tasol ol samting i bin kamap nau, i soim olsem i mas gat ol rul i kamap nau we ol spot i ken bihainim na mekim stret ol wok bilong ol. IOC i laik olgeta lain i mas bihainim ol dispela samting

long kamapim gud gavenens long spot:

1 Namba wan as bilong gut gavenens i mas stap. Dispela i karapim stretpela pasin bilong wokim ol disisen, ripot bilong mani, pablisim fainensel ripot na bihain stretpela pasin bilong wok, na komplaiens rul i mas stat long 2016.

2 IOC bai kamapim wanpela independen odit sistem bilong ol IF, NOC na OCOG. Rekomendesen 27 bilong Olimpik Ajenda 2020 bai stat long 2016. IOC i luksave long independen wok bilong ol IF na sapot bilong ol long taim bilong IOC EB miting na bai kirapim wanpela wok grup bilong spots gavenens em ol laim Asosiesen ov Sama Olimpik Intenesenel Federesen (ASOIF) i go pas long en.

3 Wan yia bihain long OIC i bin mekim sampela bikpela senis long ol pasin em i save bihainim, em i askim Intenesenel Institut ov Manesmen Developmen (IMD) long Swiselan na Global Bod Senta long mekim wok painimaut long gud gavenens long OIC yet. Ol i givim ripot bilong dispela wok i go long eksekutiv bod.

IOC EB i amamas long FIFA Eksekutiv Komiti i laik kamapim sampela senis olsem taim bilong ol bod memba i holim wok na ol arapela samting. IOC i wari tu long ol kriminal investigate i wok long kamap nau long ol bikman bilong FIFA long Swiselan na Amerika. OIC i askim FIFA long taim hariap long stretim geta dispela hevi wantaim ol lain i mekim wok bilong painimaut wanem ol paul pasin i bin kamap.



PNG Judo etlit, Raymond Ovinou i resis long intanesenel iven long Jeju, Korea las wilk.

PNGOC i laik kamap nambawan long rijon

PAPUA Niugini Olimpik Komiti i putim mak nau olsem em bai kamap namba wan Nesenel Olimpik Komiti long Pasifik long ol wok bilong en long Stratejik Plen 2016 – 2020.

Stratejik Plen bilong ogenaiesen i bin senis bihain long tupela de Stratejik Plen Riviu woksop long Novemba 21 na 22 long Pot Mosbi. Ol Bod memba, na senia manesmen i bin kamap long dispela woksop em Seketeri Jeneral bilong Australia Komonwelt Gems Federesen, Craig Philips i bin go pas long en.

Ol i bung long glasim na stretim plen bilong ogenaiesen we bai i winim mak bilong

pinis long dispela yia 2015.

I bin gat ol bung i kamap namel long ol stekholda olsem PNG Spot Faundesen, ol kopret patna, Intenesenel Olimpik Komiti, Nesenel Spoting Federesen, ol kosa bilong Tim PNG wantaim ol manesa na etlik long toktok long dispela samting.

PNGOC i bin amamas long gutpela risal bilong Tim PNG long taim bilong Pasifik Gems na i tok dispela bikpela hatwok na plen bilong ol i karim gutpela kaikai.

'Dispela gutpela risal bilong Pasifik Gems long dispela yia i lukim hatwok bilong mipela i karim kaikai. PNG i winim moa gol medal na yumi mas gat gutpela plen bilong winim

ol mak yumi laik winim,' Seketeri Jeneral bilong PNGOC, Auvita Rapilla i tok.

Nupela plen bilong PNGOC Olimpik Komiti bai strongim ol Nesenel Spot Federesen, Tim PNG na strongim wok bung wantaim ol patna na givim moa sans long ol etlit. Olgeta dispela samting bai kamapim PNGOC olsem nambawan NOC long Pasifik Rijon.

Presiden bilong PNGOC Sir John Dawanincura i sapotim dispela plen na i tok PNGOC Olimpik Komiti i bilip bai ol i kamapim kaikai bilong plen long nupela taim. Em i tok dispela plen bai helpim ol spot na kantri bilong yumi Papua Niugini.



PNG Olympic Committee Presiden, Sir John Dawanincura na meri boksa, Debbie Kaore i prisenim gif i go long Andrew Daubney bilong Trukai Industries las wik long Mosbi.

Erema strong tumas long Gigira

i kam long bek pes

Ol boi Galp i strongim banis bilong ol gut tru na mekim ol Gigira i hat long kam insait. Kosa bilong Erema i lukim olsem ol bek lain bilong Gigira i go slek na em mekim senis long straika bilong em na putim Michael Gita.

Gita, i no westim taim. Taim em go insait long 15 minit bilong pilai i pinis, em ran long wan sait bilong pilai graun i go long narapela sait na mekim ol bek lain bilong ol Gigira i paul.

Gita, i kisim wanpela gutpela tru bal kam long pilai meka bilong ol long namel. Gita wantaim golkipa bilong Gigira tasol na em pawa kik bilong em we golkipa Gigira i paul long holim. Dispela win bilong Erema 3-1 i bringim ol go namba tu long lata klostu long Hekari.

Long Sande pilai, Rapatona i kam bek long bihain na winim PS United 2-1 long pinis bilong pilai.

PS United i namba wan long skoa long namba wan hap bilong pilai. Ol i strongim banis bilong na mekim Rapatona hat long brukim banis bilong ol.

Rapatona i kisim wanpela gutpela sans long namba tu hap na levelim skoa long 1-1. Long tri minit bipo long pilai pinis, winga bilong Rapatona i mekim wan man pilai na pulim bal go insait long gol mak bilong PS na putim wining gol bilong ol Rapatona. Skoa em 2-1 long pinis bilong pilai.

Dispela wiken bai las pilai bilong dispela yia bai i kamap. Olgeta tim bai kisim tupela wik malolo na stap wantaim ol famili bilong ol long krismas na niu yia na ol bai statim gen pilai long namba 9 na 10 bilong mun Januari 2016.



Ol manmeri i lukim video long wanpela but long Sir John Guise indo kompleks long Mosbi long namba wan Spots Ekspo. Ol Foto: Andrew Molen



KAM KISIM: Pilaia bilong Erema i holim bal long lek bilong em taim namba 15 bilong Gigira i traim long kisim.



MI KAM NAMEL: Pilaia bilong PS United i pulim bai i go namel long tupela Rapatona pilaia long Sande NSL pilai long Bisini soka graun. Rapatona i win 2-1.



AIYO LEK BILONG MI YA: Pilaia bilong Gigira i rausim lek bilong em long bal taim pilaia bilong Galp Erema i traim long kisim bal long em long NSL pilai long Sarere. Erema i win 3-1.



TASIM EM YA: Pilaia bilong Hox i ranawe long pilaia bilong Eels long Gordons tas resis.



LAPUN STAP YET: Paul Komboi bilong PS United i redi long pasim bal long pilaia bilong em taim pilaia bilong Rapatona i ran kam long stopim em NSL pilai bilong long Sande.



PASIM EM LONG HAP: Tupela pilaia bilong Eels i pasim rot bilong pilaia bilong Hox long ragbi tas resis long Gordons.

Oi poto: Nicky Bernard

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by:



RD Tuna Canners Ltd.

Moa mit na
oil insait



TUNA IN OIL

Erema strong tumas long Gigira ...Rapatona kam bek na win

Nicky Bernard i raitim

GALP Erema i wok long pilai strong stret long Telikom Nesenel Soka Lig long Sauten sait bilong dispela profesinel soka. Long tupela pilai long Sarere, Hekari United i mekim save long ol boi bilong Pot Mosbi long skoa 2-0.

Hekari nau i go pas long poin lata long Sauten Konfrens na bihainim klostu em Galp Erema taim ol daunim Gigira long namba tu pilai long Sarere.

Gigira Laitapeo i gat planti sans long skoa long namba wan hap bilong pilai, tasol dispela ol sans bilong ol i go nating long sait sait bilong mak bilong ol Erema.

Dispela ol sans bilong i opim ai bilong ol boi Kerema na long 20 minit insait long namba wan hap straika bilong ol Tau Wini kisim wanpela gutpela pas kam long winga bilong ol na em kikim namba wan gol bilong ol Erema.

Dispela gol bilong ol i mekim ol boi bilong Galp i pilai strong stret, olgeta bal ol pasim na givim long ol pilaia bilong i kamap gut tru.

Long 5 minit bipo long hap taim, rait winga bilong ol Erema kisim wanpela longpela kik i kam long bek lain bilong ol. Winga bilong Erema i no westim taim em kik wanpela strongpela kik stret go painim straika bilong Tau na Tau tasim tasol go insait long net bilong ol Gigira.

Long hap taim skoa i stap olsem Erema 2 na ol Gigira stap long 0. Kosa bilong tupela tim wantaim em givim ol strongpela toktok long ol pilaia bilong ol. Kosa bilong Erema, Steven Mune i toktok long ol pilaia bilong em long pilai isi na bihainim plen bilong namba wan hap.

Namba tu hap bilong pilai i lukim tupela tim wantaim i pilai strong stret na soim wankain bal pilai. Gigira i no westim taim long 15 minit bilong pilai long namba tu. Ol namel man bilong ol I salim ol bal go kam na givim stret long straika bilong ol long putim stret long baksait bilong net bilong ol Eremas.

Lukim moa
long pes 26



Mid filda bilong Galp Erema i holim bal long lek bilong em taim pilai bilong Gigira i kaikai tit long kam rausim long lek bilong em. Erema i win 3-1. Foto: Nicky Bernard



BOROKO MOTORS



PMV

DIESEL OIL



PMV OIL BILONG YUMI

BOROKO MOTORS

PORT MORESBY	☎	325 5255
LAE	☎	472 1144
MT HAGEN	☎	542 1933
TABUBIL	☎	649 9048
KIMBE	☎	983 5035
MADANG	☎	422 2659
KOKOPO	☎	982 8193
GOROKA	☎	532 3552

Email: info@borokomotors.com.pg
Website: www.borokomotors.com.pg